

SECOND FACTVM,
 OV
DEFENSES
 DE MESSIRE
PHILIPPES

DE LA
MOTHE-HOVDANCOVRT
DVC DE CARDONNE,
 & Marechal de France,

CY-DEVANT VICE-ROY ET CAPITAINE
 General en Catalogne.

*Avec plusieurs Requestes, Arrests, & autres Actes sur ce
 interuenus, tant au Conseil, qu'ailleurs.*



A PARIS,
 Chez **LOVIS SEVESTRE**, ruë du Meurier,
 près sainct Nicolas du Chardonnet.

M. DC. XLIX.
Avec Permission & Priuilege.

SECOND TACTVM

Q V

DEFFENSES

DE MESSIRE

PHILIPPE

DE LA

NOTHE-HOVDANCOVRT

DVC DE CARBONNE

& Maréchal de France

CEBVAINT VICEROY ET CAPITANE

General en Catalogne

Par Louis SEVESTRE, sieur de Menthon,
premier Aide Nicolas du Chandonnet



A PARIS.

Chez LOUIS SEVESTRE, rue du Menil

près Saint Nicolas du Chandonnet

M. DC. XLIX.
Avec Permission de l'Imprimerie



SECOND FACTVM,

P O V R

Messire Philippes de la Mothe Houdan-
court, Duc de Cardonne, Marechal
de France, & cy-deuant Vice-Roy,
& Capitaine General de Catalogne:

C O N T R E

*Monsieur le Procureur General du Roy
au Parlement de Grenoble.*



E L O N le Droidt, les Iuges sont obligez
de considerer auant toutes choses, les
actions passées d'un Soldat accusé; *l. non
omnes, ead. §. à Barbaris, ff. de remilitari.*

C'est pourquoy les amis de Monsieur le
Mareschal de la Mothe, apres auoir leu le
Factum qui prouuoit la iustice de son De-
clinatoire; & auant que son Conseil publie celuy de ses Iustifi-
cations, ont estimé prealablement deuoir par vn Autre repre-
senter ses Seruices: qui est la plus fauorable & respectueuse
deffense que puisse auoir vn Subject, pour adoucir & flechir
son Prince irrité.

C'estoit par ce moyen, que dans l'Ecriture Sainte Ionathas
vouloit persuader au Roy Saül son pere, de ne poursuiure plus
son amy Dauid, *Opera eius bona sunt tibi valde, & percussit Phi-
listheum.* Tous les grands hommes entrepris & disgraciez, tant
dans l'Eglise que dans le Monde, se sont seruis de cette pro-
cedure en semblables occurrences aupres des Rois ou de leurs
Iuges.

Lors que les Euesques du Patriarchat d'Alexandrie voulurent entreprendre la protection de S. Athanase deuant l'Empereur Constantin, & depuis au Concile de Sardique; ils representèrent les grands & signalez seruices que ce S. Prelat auoit faits à l'Eglise, & les soins qu'il auoit pris pour sa deffense, en soustenant la Diuinité de Iesus-Christ contre les Arriens Choses qui furent tellement considerées par le Pape Iules premier, & par ledit Concile, qu'il fut absous de toutes les calomnies qu'on luy supposoit. Le Pape S. Innocent escriuant à l'Empereur Arcadius en faueur de S. Chrysostome, qui s'estoit adressé à luy dans son affliction, pour toucher le cœur de ce Prince: Il luy represente les qualitez de sa personne, son merite, & la perte que faisoit l'Eglise de la lumiere d'un si grand homme. Comme aussi Theodoret Euesque de Cyr, ayant esté depossédé par les menées de Theodose Empereur, & du deuxième Concile d'Ephese, eut recours au Pape Leon: Escriuant à René Prestre Romain, afin qu'il s'employast vers Sa Sainteté, pour obtenir d'elle un Iugement fauorable: en luy representant qu'on n'auoit pas consideré en sa personne les cheueux gris qu'il auoit acquis dans l'Eglise, & les seruices qu'il y auoit rendu. A quoy ce S. Pape ayant égard, il fut restably en ses honneurs & dignitez; ainsi qu'il se void dans les Actes du Concile de Calcedoine.

Depuis peu, le Marquis de Leganez s'est vtilement seruy de cette procedure. Car apres auoir perdu la Bataille de Lerida contre M. le mareschal de la mothe, le Roy Catholique fâché de la ruine & dissipation de la plus puissante Armée qu'il eust encore eue dans l'Espagne, le fit arrester prisonnier à Consuegra: mais cette disgrâce estant arriuée plustost par la fortune de la guerre, & la diuision des Chefs Espagnols, que par la faute de ce General, ses ennemis supposèrent qu'il auoit mal administré les Finances du Roy. Accusation inuëtée, qui obligea ce fameux Capitaine à s'en iustifier par vn Factum Apologetique, qui a esté imprimé & publié par toute l'Europe; dans lequel, avec ses autres Iustifications, sont representez les seruices, tant militaires que Politiques qu'il a rendus à la Couronne d'Espagne, depuis son enfance iusques à sa vieillesse;

les guerres qu'il a faites en la Valtoline & aux Grisons contre les François, les Batailles de Centio & Tornaunte, les prises des villes de Verceil, de Breme & de Trin, & d'autres places du Piedmont & du Parmesan. Il prend mesme part en la Victoire que le Roy de Hongrie & le Cardinal Infant emporterent à Nortlinguen. Il allegue dans la marge de son Factum les autoritez des Theologiens, Iuriscōsultes & autres Auteurs, qui tiennent que les Princes & Iuges doiuent faire reflexion sur la vie des personnes affligées. De sorte, que Sa Majesté Catholique persuadée de tant de raisons, luy rendit sa liberté sans autre formalité de Iustice, & le renuoya commander ses Armées dans la Catalogne.

Et comme l'humeur Castellane ne manque iamais à prendre des comparaisons sur les plus notables exemples de l'Histoire, le Marquis de Leganez s'applique celle de Scipion l'Africain, qui peut seruir à Monsieur le Marechal de la Mothe. Ce grand homme, que l'Antiquité represente comme le Parangon de la Vertu Romaine, fut aussi accusé par les Tribuns du Peuple, d'auoir en la guerre d'Antiochus diuertý quelques deniers appartenans à la Republique. *Iussus dicere causam*, rapporte Tite Liue en sa 4. Decade liure 8 *Sine vlla criminum mentione, Orationem magnificam de rebus à se gestis est exorsus*. Cette plaidoirie n'ayant esté conclud le premier iour, à cause des repliques & Dupliques des Tribuns, & la cause ayant esté remise au lendemain, cét Illustre Innocent y comparut derechef: mais ennuyé de telles chicaneries, il ne dit autre chose, sinon; *Messieurs, il me souuient qu'à tel iour qu'aujourd'huy ie deffis dans l'Afrique Hannibal en bataille rangée, de sorte qu'en lieu d'employer vne si heureuse Journée dans l'altercation du Procez qu'on me fait: Je suis obligé d'aller au Capitole en rendre graces à Iupiter, Estimant (Messieurs) que vous m'y deuez suiure, pour prier les Dieux qu'ils vous donnent tousiours des Capitaines faits comme moy*. Paroles qui touchent tant ce genereux Peuple, qui estoit son Iuge, sans vouloir ouyr dauantage ses Iustifications, ny entendre ses Accusateurs, il s'en alla avec luy faire des sacrifices. Et l'Historien remarque, que cette iournée de Iustification fut autant glorieuse à Scipion, que celle où il entra dans Rome triom-

phant des Puissances de Siphax & de Carthage.

Les Seruices de monsieur le Marechal de la Mothe ne sont point si petits, qu'ils ne soient de quelques poids, & considerables dans le Iugement de son affaire. Il a l'accusation commune avec ce vertueux Romain, & leur fortune est semblable en ce point, qu'ils ont tout deux principalement fait la guerre dans le propre pays des Peuples qui estoient les principaux ennemis de leur Patrie. Car comme Scipion a cela de particulier entre tous les Capitaines Romains, qu'il a dans l'Afrique mesme vengé Rome des affronts que luy auoient fait les Carthaginois dans l'Italie: Ainsi on peut dire sans vanité, qu' auparauant l'employ de monsieur le Marechal de la Mothe en Catalogne aucun François n'auoit comme luy mal-traité l'Espagnol dans les entrailles de l'Espagne: & depuis deux siecles que nous sommes en guerres presque continuelles avec cette Ialouse & Riuale Nation, iamais la France n'auoit veu sortir d'Espagne tant de Castillans naturels prisonniers, que ceux que luy a enuoyé ledit Sieur Marechal en suite de ses Victoires.

On peut à sa recommandation adiouster vne remarque historique, que depuis Charlemagne aucun autre n'a plus longtemps commandé les Armées Françoises delà les Pyrenées. Ce puissant Monarque fit plusieurs voyages en Espagne contre les Sarrazins, avec differens succez. Depuis son regne, pendant cinq cens ans, les François y ont fait peu d'entreprises, si ce n'est lors que le zele & la pieté les portoit à y fonder des ordres militaires, à faire des Croisades, & enuoyer des secours contre les Maures. Il est vray que pendant ces guerres Chrestiennes, Innic de Bigorre & Henry de Bourgongne jetterent les fondemens des Royaumes de Nauarre, d'Arragon, & de Portugal, mais ce fut par conquestes sur les infideles, & non sur les Indalgos.

Et comme si les destinées eussent voulu reseruer les guerres des deux Natiōs en ces derniers siecles, nos Rois ont abandonné durant ces temps tout ce qu'ils auoient de ce costé-là: Charles le Chauue dans la prodigue distribution des Prouinces de son Estat, fit aussi vn Comté de Barcelōne, par la succession duquel les Rois d'Arragon pretendent la Catalogne, dont la Souuerai-

neré qui deuoit estre inalienable, fut encore depuis abandonnée par S. Louys, qui ne l'a pû faire contre les loix fondamentales de France. Mais ce bon Prince auoit si grande apprehension de troubler le nouveau Christianisme d'Espagne par des guerres ciuiles, qu'il ne voulut pas mesme contester le Royaume de Castille, qui luy appartenoit legitimement par la succession de la Reyne Blanche sa mere.

Il y a eu quelques Princes François qui ont possédé le Royaume de Nauarre au delà des Pyrenées, comme les Comtes de Champagne, & apres eux quatre de nos Roys, puis les Maisons d'Evreux, de Foix, d'Albret & de Bourbon, mais tous ces Princes ont eu des guerres de peu de durée contre leurs voisins. Le Connestable du Guesclain donna deux Batailles en Espagne, dont il perdit l'une & gagna l'autre, & encore fit-il ces actions plustost comme auxiliaire, que pour l'honneur ou augmentation de la France.

L'Antipathie & la haine des deux Natiōs qu'on voit auourd'huy si enracinée, commença par les Vespres Siciliēnes, action la plus barbare & desnaturalée qui ait iamais esté faite entre les Chrestiens, & de laquelle Pierre Roy d'Arragon fut autheur: Afin de vanger cet outrage fait aux François, le Roy Philippes le Hardy passa en Espagne: & sans la mort, il eust poussé bien auant ses conquestes, apres que ce cruel Roy d'Arragon eust esté tué dans vne ambuscade qu'il auoit dressée au Cōnestable Raoul de Clermont.

Depuis le deceds de ces deux Roys, la querelle repassa d'Espagne en Sicile & à Naples, où elle se demesla pendant presque deux cens ans entre les Princes des familles d'Anjou & d'Arragon, sur la fin desquels Marthieu Comte de Foix poursuivant les droits de sa femme, entra dans la Catalogne avec vne armée Françoisē; d'où il fut contraint de se retier. Et peu apres les Catalans eleurent Comte de Barcelonne son nepveu René Roy de Sicile; mais le Roy Louys XI. par vne bizarre Politique, secourut l'Arragonnois contre ce Prince qui estoit de son sang; & lequel neantmoins eust depuis la bonté de le faire son heritier, tant de la Prouence que de ses pretentions de Sicile, de Naples & de Catalogne, qui furent les pre-

miers pretextes des guerres suiuanes.

Mais apres que le mariage de Ferdinand & d'Isabelle eut vny les Royaumes de Castille & d'Arragon, conquis celuy de Grenade, & vsurpé la Nauarre: les prétentiōs des Maisons d'Anjou & d'Arragon deuinrent l'interest des deux Nations: & là comença la jalousie des deux Couronnes, qui a du depuis diuisé l'Europe Chrestienne en deux Partis. Alors l'Espagne, qui auparauant auoit esté le jouiet des peuples estrangers, Gaulois, Carthaginois, Romains, Vandales, Alains, Gots, des Sarrafins & des Maures, voulut aussi à son tour dominer les autres. Ses Roys avec les noms des Catholiques pretendirent à la Monarchie vniuerselle, en iettant des armées dans toutes les quatres parties du monde: Il y a peu de pays & de Royaumes en la Chrestienté ausquels ils n'ayent impunémēt fait la guerre, sans qu'aucun ait eu le moyen de leur faire pratiquer la Loy du Talion dans l'Espagne. Car ce qu'à fait l'Angleterre à Calis, & les descentes que les Holandois y ont souuent faites, ressemblent plustost à des courses Pyratiques qu'à des guerres formées.

La France mesme, quoy que le plus puissant Royaume de l'Europe, & qui a dauantage empesché les desseins d'Espagne, a esté aussi plus tourmentée chez soy des Castillans qu'aucun des autres: sans que dans vne si longue suite d'années elle ait pût trouuer l'occasion de s'en reuancher dans l'Espagne, iusques au feu Roy Louys XIII. de tres-heureuse & triomphante memoire, nos Roys precedens n'y ayans pû paruenir. D'autant qu'apres que le Roy Charles VIII. eut si legerement abandonné le Roussillon, sa principale occupation, & celle du Roy Louys XII. son successeur, fut aux guerres d'Italie. Sous François I. les entreprises de Monsieur d'Asparaut en Nauarre, de l'Admiral Bonniuet en Biscaye, & de Monseigneur le Dauphin en Roussillon, passerent comme feu de paille. Pendant le regne d'Henry II. & de ses trois enfans, la France fut inquietée iusques à ce point, d'auoir veu vne garnison Castillane dans Paris, sans qu'elle luy ait pût rendre la pareille. Henry le Grand ne le voulut pas faire comme il pouuoit, se contentant de contraindre l'Espagne à rendre & restituer les Places qu'elle auoit vsurpé en France pendant nos Guerres ciuiles.

Finale.

Finale-ment, le feu Roy ayant estably la raix dans son Royaume, a eu le bon-heur de venger tant d'affronts impunément faits aux Rois ses predecesseurs. Il commença par quelques tentatiues des costez de Biscaye, Salses & Laredo. Depuis la sage conduitte de feu son Eminence ayant causé les Reuolutions arriuées en Catalogne & en Portugal, la France eut moyen de penetrer plus auant. Sa Majesté pendant son Regne s'est principalement seruie au delà des Pyrenées de monsieur le Marechal de la Mothe. Car pour monsieur d'Espenan il ne fit qu'y entrer & en sortir, le marquis de Los Velez par le Traité de la reddition de Terragonne, l'ayant obligé de ne porter plus les armes en Espagne contre Sa Majesté Catholique.

Par ce recit abregé, on void comme la proposition historique auancée est dans la verité de l'Histoire : que depuis Charlemagne, personne n'auoit si continuellement, ny pendant vn si lōg temps, commandé les armées Françoises dans l'Espagne, que monsieur le Marechal de la Mothe. Il a demeuré quatre années entieres sans auoir fait aucun voyage à la Cour, *comme font les autres Generaux d'armées*. Il y a opiniaistrement fait la guerre : Il y a gagné des Batailles, dissipé & ruiné sept armées Castillanes, assiégé & pris des Villes, fait leuer nombre de Sieges aux ennemis, & y a eu, quoy qu'avec differens succez, tant de combats, que iusques alors l'Espagnol ne s'estoit point veu chez luy si bien attaqué. Le feu Roy, dans les Prouisions de marechal de France, luy fait l'honneur d'vser de ces termes, à propos de la victoire de Ville-franche, *En sorte qu'il n'y a personne qui ne iuge combien ce coup ébranle les affaires d'Espagne, & affermit le bon estat des nostres*. Choses qui obligerent enfin le Roy Catholique d'agir luy-mesme, & de marcher en personne pour la deffense de ses Royaumes, en sortant de Madrid, d'où luy & les deux Rois ses predecesseurs, auoient depuis quatre-vingts ans sans bouger de leur cabinet troublé toute la terre.

Les amis de monsieur le Marechal de la Mothe sont contrains de releuer ses actions, puis qu'ils ne les estallent pas pour en tirer vanité ; mais pour éuiter le peril de ses accusations, & y trouuer la feureté de sa Personne. En pareils accidens la Philosophie permet aux Sages de se louer eux-mesmes. Plutarque

l'enseigne ainsi dans ses Morales : & Tite-Liue en rapporte cette raison , parlant de la fauorable audience que baillerent les Romains aux louanges que se donnoit Scipion : *Aurum fastidium aberat , quia pro periculo , non in gloriam , referabantur.*

Monsieur le Mareschal de la Mothe est venu aux dignitez qu'il possede , par tous les degrez où l'espee fait monter vn Gentil-homme. De Soldat il fut Cornette de la Cōpagnie d'un Prince. S'estant remis dans l'Infanterie , il fut Capitaine , puis premier Capitaine au Regiment du Prince de Pfalsbourg. En apres Mestre de Camp de Caualerie & d'Infanterie , Gouverneur de place frontiere , mareschal de Bataille , Lieutenant de Roy dans vne Prouince , mareschal de Camp (en laquelle qualite il a commandé corps d'armée à part) Lieutenant general dans les armées d'un Prince du Sang , & depuis d'un Mareschal de France. En fin General d'armée en chef , Mareschal de France en suite d'une signalée Victoire , Vice-Roy de Catalogne , & apres vne autre Bataille gagnée , Duc de Cardonne.

Il a seruy en tous les païs où le feu roy son maistre a fait la guerre. En France , en Lorraine , aux Païs-bas , en Allemagne , au Comté de Bourgogne , en Italie , & en Espagne. Il commença l'an 1622. à porter les armes aux attaques de Negrepelisse & S. Antonin. Aux sieges de Sommieres , de Lunel , & de Montpellier , il fut Cornette de la Compagnie de monsieur le Duc de mayenne , de laquelle monsieur de la mothe , vn de ses freres aisnez , estoit Capitaine-Lieutenant , lequel estant mort apres à Beziers des bleffeures qu'il auoit receu à ce dernier siege , la paix faite en France , cette Compagnie fut reformée avec beaucoup d'autres , & monsieur de la mothe demeura avec monsieur l'Euesque de mande son frere à la suite de la Cour.

L'an 1625. ceux de la Religion pretenduë ayans rompu la paix de montpellier , monsieur de la mothe se renga Volontaire en l'Isle d'Oleron , où M^r d'Houdancourt son frere aisné commandoit le Regiment de la Reyne-mere. Il fut à la Bataille Nauale , que gagna M^r de Montmorency contre les rochelais , & en suite à la prise de l'Isle de Ré. Deux ans apres , le Duc de Bukinghan ayant avec toutes les forces d'Angleterre attaqué & assiege le

port de S. Martin en ladite Isle de Ré, M^r l'Euesque de Mande eut ordre du Roy de faire preparer les choses necessaires pour y ietter du secours. Mondit Sr de la Mothe l'accompagna & assista dans cet employ, & depuis passa dans l'Isle avec M^r le Marechal de Schomberg lors de la leuée du Siege, & fut à la defaite de l'armée Angloise.

Il assista aux commencemens du Siege de la Rochelle, d'où le Roy l'enuoya en Dauphiné cōmander le Regiment de Pfalsbourg, duquel il se trouuoit premier Capitaine. Il gouuerna le dit Regiment avec tant d'ordre, de soin & de depense, qu'il a esté vn des meilleurs, & des plus complets qui se soient veus dans les armées & Prouinces où il a seruy: Soins que M^r de la Mothe a depuis continué, pour les Regimens de Caualerie & d'Infanterie qui ont porté son Nom.

Monseigneur le Prince Generalissime en Lâguedoc, Dauphiné, Guyenne & Prouence, ayant resolu de nettoyer le Rhosne des places que les Huguenots y auoient fortifiées, il commença par le Siege de Soyon en Viualets, où il fit venir le Regiment de Pfalsbourg. Cette ville estant de difficile accez, son Altesse commanda à M^r de la Mothe de l'aller reconnoistre par la plaine de Roullant avec deux cens hommes de son Regiment. Il executa cet Ordre si heureusement, qu'il deffit l'ennemy en 3. embuscades l'une apres l'autre: & l'histoire remarque, qu'il les contraignit à coups d'espée & de fourchettes de s'enfuyr & retirer dans la place, qui se rendit deux iours apres. Son Altesse en suite avec le Regiment de pfalsbourg, emporta sur les ennemis les Forts de S. Albans & de Beauchastel, & par telles conquestes reestablit le commerce du Rhosne.

Ceux de Nismes ayās surpris les chasteaux de Vauuert, & du Quellart: M^r le Duc de Rohan estant arriué aux enuirs de ladite ville, vouloit disputer le passage de la riuiera du Vistre à l'armée de monseigneur le Prince. Son Altesse afin de surmonter cette difficulté, ordonna à trois compagnies de Cauallerie d'escorter le Regiment de Pfalsbourg, & commanda à M^r de la Mothe de passer la riuiera & d'en asseurer le passage. Il executa ce commandement assez difficile avec tant d'ordre, & avec vne contenance si resoluë, que les troupes de M^r le Duc de Ro-

han estonnées de cette hardiesse ne l'oserent empescher: tellement qu'il gagna l'autre bord, & s'y retrancha en sorte, que le passage demeura assés au reste de l'Armée.

Sa valeur parut grandement à papiers: car apres que le Regiment de Normádie eut esté à l'assaut, & qu'il fut repoussé de la breche avec perte notable: monseigneur le prince permit à M. de la Mothe qui s'y estoit offert, d'y donner avec le Regiment de Pfalsbourg. Ce qu'il executa, & en forçat l'opiniastre resistance des ennemis, se logea sur la breche, ayât eu ordre de son Altesse de ne passer plus auât à cause qu'il estoit tard. Mais l'effect de cette genereuse action fut si effectif, que pendant la nuit Beaufort avec sa Garnison s'enfuit de la ville, laquelle se rendit le lendemain à discretion.

Il continua à bien servir au Degast de Castres, & aux Sieges de Realmont, de S. Seuer, & de Castelnau. Son Altesse luy donna le commandemēt de la retraite de S^{te} Afrique; & l'employa en toutes les occasions, qui se presenterent en assez bon nōbre pendāt cette Campagne, qui finit par le secours de Creissel que M. de Rohan auoit assiegé, & d'où il fut cōtraint de se retirer en desordre. Apres cette action, monseigneur le prince quitta le Languedoc, & s'en allāt en Berry par Lectoure, il eut aduis que ceux de Montauban luy auoient dressé vne embuscade. Pourquoy il prit chemin cōtraire, & enuoya les Ordres au Regimēt de Normandie d'en dresser vne, & à M^r de la Mothe d'en faire vne autre avec le Regiment de Pfalsbourg. Les choses furent si bien disposées, que la Garnison de Montauban ayant manqué l'embuscade qu'elle auoit dressé à son Altesse, fut à son retour presque toute taillée en pieces, par le Regiment de Pfalsbourg conduit de M^r de la Mothe.

Monseigneur le Prince s'en estant allé en Cour, le commandement de l'armée demeura à M. le Duc de Montmorency, lequel continua d'employer M^r de la Mothe dans tous les Sieges & occasions, qui furent en ce temps-là fort frequentes dans le Languedoc, aux Seuenes, aux pays de Foix & de Viuarets. Mais cependant le Roy, apres auoir forcé les Alpes, fait leuer le premier Siege de Casal, & donné vne paix à l'Italie: Sa Majesté desirant finir en personne les guerres de la Religion, vint avec

vne diligence extraordinaire assieger Priuas. Le Regiment de Pfalsbourg fut commādē de venir à ce Siege, où la presence du Roy redoublant le courage à M^r de la Mothe, il eut assez de bon-heur pour y faire paroistre & sa valeur & sa conduitte. En presence de l'armée Royale, & à la veuē de la Ville assiegée, il tua en combat singulier vn Cauallier des ennemis, qui auoit enleué la pique d'un soldat de sa Compagnie. Et lors de l'assaut general du 26. de May, apres s'estre degagé des terres de la mine qui l'auoient presque enseuely, il y alla si vertement avec le Regiment de Pfalsbourg, que la corne du Bastion qu'on attaquoit fut emportée; Ledit Regiment y acquit beaucoup d'honneur, nōbre de ses Officiers y demeurerent, M^r de Chamblé Lieutenant Colonel le commandoit en cette occasion, la presence du Roy l'ayant fait venir à ce Siege. Iusques alors il auoit esté absent, & M^r de la Mothe comme premier Capitaine auoit tousiours commandé le Regiment.

La nuit du lendemain de cēt assaut, l'armée Royale estant dans l'estonnement de n'entendre plus le bruit qui se fait ordinairement dans les factions de guerre en vne Ville assiegée; vn soldat appellé l'Orange en sortit, & dōna aduis que les habitās & la garnison, sur vne opiniō qu'ils estoient trahis, & qu'ils deuoient cette nuit estre attaquez de tous costez, auoient pris telle épouuante qu'ils auroient tous abandonné la ville; les vns s'estant retirez au Chasteau, & les autres fuy dās les mōtagnes. L'Orange fut mené au Roy & à M^r le Cardinal Duc, qui iugea l'action extraordinaire, & qu'on ne se deuoit pas totalement fier au rapport du soldat, ny aussi absolument le negliger; de peur qu'auant le iour les ennemis se reconneussent. Parquoy son Eminence ordonna à M^{rs} de Marillac & Deffiat Mareschaux de Camp, de cōmander à M^r de la Mothe de prendre la moitié du Regiment de Pfalsbourg, & d'entrer dans la ville avec deffiance, & bride en main. On luy remit l'Orange lié & gardé, avec ordre de le faire tuer en cas de fourberie: mais tout ce qu'il auoit rapporté se trouua veritable. M^r de la Mothe ayāt trouué la porte de la Ville ouuerte, il s'en asseura, y establisant corps de garde, & auāt que s'auancer dauantage fit visiter les maisons voisines, & en suite les autres iusqu'à la place, qui se trouuerēt

toutes abandonnées pleines de viures, d'armes, & de cheuaux, la terreur pannique ayant esté si grande, que presque en toutes le souper préparé se trouuoit sur la table, ou encor dans la broche. La Ville estant asseurée, crainte d'irruption M^r de la Mothe fit barricader, & mit corps de garde aux auenuës du Chasteau, puis fit crier à l'Armée de dessus les murailles **V I V E L E R O Y**. Le Mercure François rapporte, que cette voix du Regiment de Pfalsbourg donna la ioye à toute l'armée : & soudain ce bruit entendu, le Regiment des Gardes se mit en deuoir d'y faire son entrée, avec autant de ioye, que les fuyards auoient de frayeur & de tristesse.

Prius pris, les autres places se rendirent à la veuë du Roy, il n'y eut qu'Alez qui soutint quelques iours le siege, apres lequel se fit la paix d'Anduze qui termina nos guerres ciuiles. M^r de la Mothe assista en toutes ces dernieres occasions, & accompagna son Eminence aux redditiōs de Nismes, Castres & Montauban.

NOs guerres de la Religion estans heureusement finies, les estrangers recommencerent la Campagne suiuiante, qui fut celle de 1630. le Roy enuoyant Monseigneur le Cardinal Duc de Richelieu Generalissime delà les Monts : le Regiment de Pfalsbourg que cōmandoit M^r de la Mothe fut choisi pour estre de son Armée, & assista aux prises de Pignerol & de Briqueras : & apres que son Eminence fut repassé en Sauoye où estoit le Roy, il ne laissa pas de demeurer en Italie, iusques à la leuée du siege de Casal.

A l'attaque du Pont de Carignā, messieurs les Ducs de Montmorency & de la Force Generaux de l'Armée François, luy firent l'honneur de le choisir, avec messieurs de Lambert & d'Argencour, pour aller reconnoistre la demy-lune qui defendoit le Pont, & sur son raport luy donnerent le commandement d'une des trois attaques. Il l'executa courageusemēt avec des soldats choisis du Regiment de Pfalsbourg. L'action est vne des signalées de cette Campagne, monsieur de la mothe y fut blessé, & eut grande part à cette victoire.

En l'année 1631. il suiuit le Roy au voyage de Mets, pendāt lequel M^r d'Houdancour son frere aisné fut fait Gouverneur de Marsal. En l'année 1632. il fut pour la derniere fois commander

le Regiment de Pfalsbourg au siege de S. Felix de Carmain , & au combat de Castelnau-darry. L'année 1633. il accompagna le Roy au siege de Nancy.

Après 13. ans de seruices, Sa Majesté gratifia Mr de la Mothe du Gouuernemēt de Bellegarde & d'un Regiment: charges qui vaquoient toutes ensemble par la mort de Mr de la Grange Auec ce Regiment (du depuis appellé de son nom de la Mothe) il fit le voyage des Pays-bas; & si comporta si bien, qu'après la bataille d'Hauuin, il merita l'approbation de messieurs les Generaux, qui luy donnerent en suite la conduite d'une des Attaques à la prise de Tillemont: & depuis, l'entreprise de Louvain ayant manqué, il fut avec sondit Regiment sous Mr le Prince d'Oranges aux fameux siege & reprise du Fort de Scheink.

Retourné en France, le Roy le fit Sergent de Bataille, pour seruir au Comté de Bourgogne: & sur la fin de la Campagne, il eut le bon-heur de rendre vn seruice effectif à la France, lors que Galaz & le Duc Charles y entrèrent avec vne armée formidable: car dès l'instant qu'ils eurent inuesty S. Iean de Laune d'un des costez de la riuere, Mr de la Mothe (qui s'estoit préparé à soustenir le siege dans sa place, qu'on croyoit deuoir estre attaquée (voyant le peril euidēt de cete Ville, sans attendre aucun ordre, y conduisit luy-mesme 200. hommes qu'il tira de sa Garnison; & apres auoir conseré avec le Gouverneur, & donné cœur aux habitans pour se bien defendre, il retourna à Bellegarde accompagné seulement de six cavaliers. Monseigneur le Prince & Mr le Cardinal de la Vallette estimerent beaucoup cete action; escriuans au Roy qu'elle auoit conserué la Bourgogne. Et en effet, par ce secours S. Iean de Laune eut le pouuoir de soustenir les premieres attaques, & d'attendre les derniers secours, qui firent leuer le siege à ces puissans ennemis.

Sa Majesté extremément satisfaite de cete bonne action, enuoya le Breuet de mareschal de Camp à Mr de la Mothe; avec ordre de commander vn corps d'Armée, qu'on destinoit pour executer vne entreprise sur Rhinfeld; laquelle ayant failly par le manquement de ceux qui en auoient donné l'aduis en Cour, il eut nouuel ordre de Sa Majesté d'aller avec le corps qu'il commandoit vers Montbelliard, & d'y attaquer la Ville de l'Isle & le

fort de Matha, qui incommodoit beaucoup cette place importante. M^r le Comte de Gränzey qui en estoit Gouverneur, pour l'exécution de ce dessein, ioignit M^r de la Mothe avec ce qu'il pût de la Garnison & des milices du païs: ils attaquèrent tous deux si vertement le Fort de Matha, qu'il se rendit aussi-tost.

Ils eurent plus de difficulté à l'Isle: cette Ville assez considerable dans le Comté de Bourgogne, située au milieu de la riviere du Doux, est peu accessible, sinon lors que la riviere se trouue guéable: Ce qui se rencōtra au mois de Juillet qu'on l'assiegea; elle se trouua lors fortifiée d'une grosse Garnison, & de plus, le Marquis de S. Martin avoit promis de la secourir. Le canon y ayant fait breche assez raisonnable, les regimens de la Mothe & du Perche, sōstenus de ceux de Dānenoux & de la Suze, allerent à l'assaut dans l'eau iusques à la ceinture: les assiegez que nostre canon repoussoit de la breche percerent les maisons, & s'y retrancherent, apres avoir mis sur la breche quantité de bois auquel ils mirent le feu; mais malgré toutes ces deffenses, nos soldats passerent au trauers de l'eau & du feu, & se rendirent maistres de la breche, & en suite de la Ville: les ennemis se defendirēt de ruē en ruē iusqu'au Chasteau, où ils s'enfermerent; & s'y en alloient estre forcez, sans les cris de quatre à cinq cens femmes, qui obtindrent capitulation de M^r de la Mothe, par laquelle le Gouverneur & deux Capitaines en sortirent l'espée au costé & la vie sauue, les autres furent pris à discretion.

Pendant le siege de l'Isle, M^r de la Mothe receut Lettres du Roy pour aller seruir de mareschal de Camp en l'Armée d'Allemagne sous M^r le Duc de Weymar, & d'y mener le corps d'Armée qu'il conduisoit, il ioignit ce Prince au siege de la ville de Beaume. Apres la prise de cette place toute l'Armée marcha vers le Rhin, où elle s'amusa à bastir des Forts. Deux fois que M^r le Duc de Weymar passa au delà de ce grād Fleuve, M^r de la Mothe y donna des preuues de son courage, & de l'experience qu'il auoit dans la guerre: car en vn rencontre, par l'ordre de M^r du Hallier Lieutenant General de l'armée, dans vn cōbat opiniastreté pendant 2. heures, il tailla en pieces vn party auancé de l'armée ennemie: & vne autrefois conduisant l'auant-garde de l'armée, il deffit toute l'arriere-garde de Iean de Werth, qu'il contrai-

contraignit de se retirer en desordre à Offenbourg. Peu de iours apres cette remarquable action, il fut surpris d'une maladie, pour laquelle les medecins luy ordonnerent de reuenir en France. Monsieur le Duc de Weymar regretta son absence, & tesmoigna par Lettres à sa Majesté & à son Eminence, qu'il auoit reconnu en ce Gentil-homme tant de hautes qualitez pour la guerre, que s'il viuoit il seroit vn des grands Capitaines de son temps.

La Campagne suiuite, Monsieur de Guebriant & luy, eschangerent leurs emplois, par ie ne scay quelle fatalité, qui les deuoit tous deux en mesme temps si glorieusement esleuer. L'un passa en l'armée d'Allemagne, & l'autre en celle du Comté. Afin de seruir vtilement, Monsieur de la Mothe fut à Beaune receuoir les ordres de Monsieur le Duc de Longueuille son General, qui luy commanda d'aller avec partie de l'armée attaquer le chasteau de Chaussin, que Brisenot François transfuge occupoit depuis deux ans, faisant mille rauages aux pays circonuoisins. Ce desesperé voulut resister, mais apres vingt volées de six canons, ses compagnons le contraignirent de se rendre à discretion. Il fut pendu deuant la place, & cinquante de ses soldats enuoyez aux galeres.

De là, il s'en alla ioindre Monsieur le Duc de Longueuille, lequel marchoit pour faire leuer le siege d'Aigremont au Duc Charles, qu'il contraignit à se retirer, & en suite le poursuiuit iusques à Poligny, où il l'obligea à la bataille. La France emporta là vne victoire, qu'elle doit à la valeur & conduite de ce genereux Prince, qui fit des merueilles en ce combat opiniastré pendant sept heures. Il y fit tant de ralliemens, & se mella si souuent parmy les ennemis, qu'il jetta la terreur dans leurs troupes, & redoubla le courage des nostres. Ce Prince pour commencer le combat fit choisir de tous les corps quinze cens hommes, qu'il donna à conduire à Monsieur de la Mothe, afin d'en chasser deux mille du Duc Charles, campez dans vn bois, où ils s'estoient desia retranchez avec deux canons, pour s'y maintenir & endommager nostre armée. Monsieur de la Mothe les y attaqua avec tant de vigueur, que nonobstant vne resistance opiniastrée il se saisit de leurs deux canons, & les cha

avec desfroute de ce lieu auantageux : dans lequel monsieur de feuquieres avec l'auantgarde del'Armée françoise , eut ordre de s'aller poster ; & le deffendit depuis contre le Duc Charles, qui fit des efforts extraordinaires pour le reprendre. Apres cette action si heureusement executée , monsieur de Longueuille appella monsieur de la mothe au corps de reserue , consistant aux Regiment de marfin & de Barilly ; avec lesquels il luy ordonna de faire front à l'aisle gauche des ennemis , du costé de laquelle il apprehendoit quelque notable irruption. monsieur de la mothe la soustint iudicieusement , & la repoussa autant de fois qu'elle voulut s'auancer , executant si ponctuellement les ordres de monsieur de Longueuille , que du depuis il a esté honoré de ce Prince d'une tres. parfaite & particuliere amitié.

La reddition de la ville de Poligny fut le fruit de cette victoire : apres laquelle monsieur de Longueuille donna les ordres à monsieur de la mothe de se saisir de la Vallée de Baume ; lieu de difficile accez , & que les Comtois tenoient comme imprenable : y ayant au fonds de ladite Vallée vne Abbaye , vn fort , & vne Tour bien flanquée : Pieces qui se ioignoient par lignes de communication. monsieur de la mothe apres auoir reconnu le tout , l'attaqua par l'endroit que les ennemis tenoient le plus fort & le moins accessible , & qui comme tel estoit le moins gardé , en sorte qu'estans inopinément surpris , ils furent poussez iusqu'à la Tour , qu'ils rendirent à composition , avec de l'argent qu'ils promirent & donnerent pour les frais de l'Armée.

Le Duc Charles ayant repris quelque cœur depuis sa desfroute , enuoya le Colonel Antorpe avec partie de son Armée attaquer le chasteau de Vadans , qu'il emporta. En suite il voulut assieger celuy de Poligny , au secours duquel m^r de Longueuille enuoya m^r de la mothe : Il le secourut en telle diligence , qu'à son arriuée impreueüe , le Regiment de S. mauris qui gardoit les dehors lascha le pied , & fut deffait , & il entra dans la place. Ce qui obligea les autres assiegeãs de songer à la retraite : mais mondit Sieur de la mothe pour leur empescher , les attrapa à la sortie de Poligny , les mit en suite , leur tua encor quatre cens hommss , & prit quantité de prisonniers , entre lesquels se trouua Antorpe leur Commandant , qu'il enuoya à Bellegarde.

Après tant de pertes, le Duc Charles croyant estre plus heureux en Lorraine qu'au Comté: il y alla surprendre Luneville, qu'il fortifia & munit d'une garnison de plus de deux mille hommes. Monsieur de Longueville eut ordre du Roy de le suivre, & de reprendre cette Place. Il donna à M^r de la Mothe le commandement d'une des attaques, en laquelle ce Prince qui avoit l'œil sur toutes, assista presque tousiours: & sa presence fit que les ennemis y ayans fait une sortie, furent repoussez avec tant de bon-heur, que M^r de la Mothe & les siens entrèrent meslez avec les ennemis dans la Place, qui fut lors emportée.

Peu apres le Duc Sauelli ayant esté poussé en une grande rencontre, se renferma dans Blamont, où estoient les magazins de l'Empereur & du Duc Charles: Il y fut incontinent assiégré, & monsieur de la Mothe y auança si brusquement les attaques par l'ordre de monsieur de Longueville, que ledit Duc Sauelli jugeant la prise de cette Ville infaillible, ayma mieux s'euader par une nuit obscure, que d'attendre la capitulation. Apres sa fuite, les soldats abandonnez de leur General, se rendirent à discretion. Le butin d'armes & de cheuaux y fut tel, que monsieur de Longueville en equipa les troupes qui formerent le secours considerable qu'il enuoya à monsieur le Duc de Weymar pour la continuation du siege de Brisac. Il desira que monsieur de la Mothe accompagnast monsieur de Feuquieres en la conduite de ce secours: ce qui fut executé heureusement, iusques au lieu où ce Prince leur auoit ordonné de le remettre. Pendant cette marche, cinq cens maistres furent deffaits au Capitaine Cliquot, & tout leur bagage pris.

Cette Campagne fut longue, & au retour d'icelle le Roy fut tellement satisfait des seruices de monsieur de la Mothe, que Sa Majesté le gratifia de sa Lieutenance de Roy en Bresse. Apres qu'il eut pris possession de cette nouuelle dignité, il retourna au Comté, où sur les aduis que les ennemis s'amassoient à Saint Claude, qu'ils faisoient leur place d'Armes, il eut ordre de les y aller attaquer. Ils voulurent faire resistance, mais la ville ayant esté emportée de force apres quelques iours de siege, monsieur de la Mothe employa tous ses soins pour arrester la furie des soldats, & la suite ordinaire de telles occasions; & eut grande

peine à conseruer l'Eglise qui estoit pleine de richesses, & si recommandable par ses saintes Reliques, qui la font vn des grands Pelerinages de la Chrestienté.

IL fut apres cette expedition reioindre monsieur le Duc de Longueuille, lequel allant à l'entreprise de Salins, eut ordre de la Cour de passer en Italie au secours de Madame Royale. Ce Prince donna l'ordre à M^r de la Mothe de mener l'Armée en la plus grande diligence qui luy seroit possible. Ce qu'il executa avec vn si heureux succez en son voyage, qu'en passant il raffermist en la fidelité de Madame Royale toutes les villes du Marquisat de Saluces: & arriua assez tost pour asseurer & fortifier le siege qu'auoit mis deuât Chiua Monseigneur le Cardinal de la Vallette: Lequel ayant eu aduis que le Prince Thomas avec le Marquis de Leganez marchoiēt avec vne puissante Armée pour secourir cette ville assiegée: Il escriuit par le Sieur de Graues Escuyer de feu monseigneur le Cardinal Duc à M^r de la Mothe, pour le prier que sans attendre l'arriuée ny les ordres de M^r de Longueuille son General, il vint à Chiua, où il s'agissoit du plus grand seruice qu'il pourroit iamais rendre à l'Estat. Ledit S^r de Graues n'obmit rien pour le resoudre à vne telle occasion, tant par la consideration de la gloire qu'il auoit lieu d'acquérir, que du malheur qu'on luy imputeroit, s'il mesarriuoit du siege & de l'Armée de monseigneur le Cardinal de la Vallette. C'est pourquoy il marcha iour & nuict avec vne diligence si bien mesnagée, qu'il arriua deux heures auant que le Prince Thomas & le Marquis de Leganez parussent à nos lignes, lesquelles ils estoient emporter d'emblée, à cause qu'elles n'estoiēt pas encore acheuées. Ils furent surpris, apprenans l'arriuée des troupes auxiliaires, conduites par M^r de la Mothe, & faisant alte, delibererent s'ils s'en retourneroient sans executer leur entreprise: laquelle ils retarderent trois iours, apres lesquels ils firent leur attaque, en laquelle ils furent repoussez apres vn combat de deux heures, qui les obligea à se retirer. Mais ce qui resioiūt le plus les deux Armées iointes, & qui fut de bon augure pour la victoire, fut la presence de M^r de Longueuille, qui sur le bruit d'yne si belle occasion prit la poste, & arriua au Camp trois

heures avant le combat. Monsieur de la Mothe eut commandement de Messieurs les Generaux de suivre avec quinze cens chevaux l'ennemy dans sa retraite, lequel il mit en tel desordre en vn accul pres de la Cesia, qu'il l'eust contraint à la bataille avec vne certitude de victoire, si mondit Seigneur le Cardinal de la Vallette eust voulu quitter pour trois heures les lignes de Chiuas, lequel ayant perdu l'esperance du secours, se rendit le lendemain à discretion.

Après cette glorieuse reddition les deux armées s'estant separees, Monsieur de Longueville alla assieger la Ville & Chasteau de Bene. Au regard de la Ville, elle se soumit d'abord. Pour le Chasteau, que les Piedmontois tenoient pour imprenable, il resista: On y vint par la mine, l'effect de laquelle fut si bon, qu'il fut emporté d'assaut, monsieur de la Mothe travailla infatigablement à ce siege.

Monsieur de Longueville s'en alloit faire d'autres progres, lors qu'il receut vn Courier de madame Royale, qui luy donnoit aduis qu'elle estoit assiegée dans la Citadelle de Turin, la Ville ayant esté surprise par les Princes de Sauoye. Toutes affaires cessantes, il fallut aller en diligence au secours de madite Dame Royale, où Monseigneur le Cardinal de la Vallette se rencontra en mesme temps. Les deux armées iointes commencerent à former le siege de Turin, qui fut interrompu par vne suspension d'armes de deux mois en Piémont.

Pendant cette trêve, monsieur de Longueville receut ordre du Roy d'aller commander en Allemagne, l'armée du Duc de Weymar, Sa Majesté ne pouuant choisir pour cet important employ vn Chef de plus haute reputation, ny de valeur plus éprouuée que ce Genereux Prince, lequel en sortant d'Italie laissa à monsieur de la Mothe toute la conduite de son armée, qu'il commanda depuis en Corps à part, sous le Generalat de monseigneur le Cardinal de la Vallette.

Cét Illustre Cardinal estant mort dans l'employ, monsieur le Comte d'Harcour luy succeda, lequel y commença les merueilles qu'il a faites en Italie, en iettant vn secours d'hommes & de munitions dans Casal. Afin de faciliter ce dessein, il estoit expedient de prendre Quiers. Pour cela la nuit du 24 Octobre

(qu'expiroit la trêve de deux mois en Piémont) il commanda à monsieur de la Mothe d'aller inuestir cette place. Ce qu'il executa si heureusement, qu'aux approches il deffit quatre cens cheuaux Espagnols, ausquels dans l'espouuante de la fuite, les habitans fermerent les portes de leur ville: & le lendemain en faciliterent la prise à l'arriuée de monsieur le Comte d'Harcour, apres quelques volées de canon.

De Quiers, mondit sieur le Comte d'Harcour fit heureusement rafraischir Casal de toutes les choses necessaires: mais les ennemis n'ayans pû empescher ce secours, se resolurent à nous incommoder & affamer. Pour ce, les Princes de Sauoye coupoient les viures du costé de Turin, & à pareil dessein le Marquis de Leganez se vint poster pres de Quiers à Poirin, Cambian & Villestelon. Ce qui nous reduisit à pastir pendant quelques iours, & à souffrir de grâdes necessitez: qui obligerent nostre armée d'abandonner Quiers, pour aller prendre les quartiers d'hyuer en des endroits où elle pût estre plus au large. Resolution qui donna lieu au fameux combat de la Route, qu'on peut mettre entre les plus belles retraittes de ce temps.

L'armée Françoisé qui n'estoit que de neuf à dix mille hommes, partit de Quiers deux heures auât le iour le 19. de Novembre: Premièrement l'auant-garde, où estoit monsieur le Comte d'Harcour, conduite par messieurs les Mareschaux de Turenne & Pleffis-Praslin. Apres laquelle marchoit le bagage, qui estoit fuiuy de l'arriere-garde cōduite par monsieur de la Mothe. Dès la nuit du depart de l'armée, le Marquis de Leganez en eut si promptement aduis, qu'il eut temps d'enuoyer au Prince Thomas à ce qu'il marchast à la rencontre avec ses forces, comme luy se preparoit à nous suiure avec toutes les siennes. Par les mesmes enuoyez ils conuinrent tous deux de leurs attaques. Ce General Espagnol estoit si bien aduerty, que ses coureurs partis de Poirin où il campoit, entrerent par vne porte dans Quiers en mesme temps que les dernieres troupes de l'arriere-garde Françoisé en sortoient par vne autre.

Sur les cinq heures du soir M^r le Prince Thomas, qui estoit sorti de Turin dès l'instant qu'il eut receu aduis, attaquâ l'auant-garde avec trois mille hōmes de pied & quinze cens che-

naux. Les attaques & les resistances furent grandes & tres-glorieuses pour ceux qui les commandoient.

On ne les particularise pas, ne s'agissant icy que de ce qui se passa dans l'arriere-garde conduite par M^r de la Mothe, qui soutint seule le plus grand effort, ayât esté attaquée de toute l'Armée Espagnolle, composé de 9000. hommes de pied & de cinq mil chevaux. La nostre n'estoit alors forte que de dixhuit cens chevaux, & de trois mille hommes de pied, mais bonnes troupes, lesquelles sur cette fin de Campagne, restoit seules de l'Armée de M^r de Longueville.

Dès les huit heures du matin la Cauallerie Espagnolle sortie de Poirin, commença sur la gauche à costoyer M^r de la Mothe, sans qu'il y eust autre combat que legeres escarmouches entre coureurs, & ainsi l'arriere-garde ne laissoit pas de continuer sa marche : mais pour la retarder & l'arrester au passage de la Route, le marquis de Leganez destacha trois gros escadrons de Dragons, qui vinrent fondre sur nos coureurs environ les deux heures apres midy. Ce qui obligea M^r de la Mothe à faire alte, tourner teste, & disposer ses troupes selon le lieu afin de profiter de l'avantage du terrain : il commanda le S^r de Florinville avec 300. mousquetaires, & le S^r de Porcheux avec 150. autres du Regiment des Gardes, & la Compagnie de Monseigneur le Prince conduite par le S^r de mauillers pour soutenir lesdits Coureurs de son armée : Ce qu'ils firent brauement. Le combat fut grand, & les Dragons Espagnols y furent bien battus.

Sur les 3. heures le marquis de Leganez arriva en presence, & nous attaqua en flanc avec toute son armée, & fit deux batteries de canons à la portée du mousquet. Pour resister à cette dure attaque qui dura deux heures, monsieur de la Mothe mit ordre par tout, allant d'escadron en escadron, & dans les bataillons encourageant les troupes par sa resolution & son exemple. Il y fut grandement secondé par tous les Chefs & Capitaines qui composoient l'arriere-garde. Tous ceux du Regiment d'Anguyen y firent des merueilles, messieurs de marsin, Florinville, Baroy, d'Arzilieres, de Ferracieres, Chastillons, Porcheux, S. André, montbrun, Boisdavid & Beauregard, y donnerent des preuues de leur valeur.

Après cette attaque si glorieusement soustenuë, sur le soir le marquis de Leganez sembloit se vouloir retirer, lors qu'ayant sceu que le Prince Thomas estoit aux prises avec l'avant-garde, il retourna sur les six heures au combat plus rudement qu'il n'auoit fait auparauant. Et alors il attaqua par les quatre costez M^r de la Mothe, qui fit teste par tout sans perdre vn seul pouce de terre: & comme si la nuit eust redoublé le courage de l'armée Espagnolle, elle continua à la faueur d'un clair de lune avec plus de vigueur le combat. En sorte que nos gens apres auoir vuidé leurs bandolieres, reduits à l'espée & à la picque se deffendirent neantmoins courageusement de tant d'ennemis. Le marquis de Leganez voyant les troupes harassées d'un si long combat, & n'ayant pû enfoncer les nostres, il les retira sur les trois heures apres minuit pour leur donner quelque relâche, afin de retourner le matin à l'attaque, mais cependant monsieur de la Mothe continua sa marche, & fut passé auant le iour.

Aux deux combats de l'avant-garde & de l'arriere-garde, les ennemis y perdirent plus de trois mille hommes, & cinq cens y demeurèrent des nostres. monsieur le Comted'Harcour qui estoit occupé ailleurs cōtre M^r le Prince Thomas, ne pût ayder ny secourir M^r de la Mothe que de cent cinquante mousquetaires tirez du Regiment des Gardes, qu'il luy enuoya par le sieur de Porcheux. De façon que la posterité s'estonnera, de ce que M^r de la Mothe avec si peu de secours, & avec vn corps d'armée qui n'estoit pas de cinq mil hommes, apres vne marche de dix heures, ait pû encore soustenir iour & nuit vn combat opiniastré pendant treize heures, sans perdre rien de son terrain: contre vne armée Espagnolle de 14000. hommes, commandée par le plus grand Capitaine qu'eut le Roy Catholique, & lequel sa Nation iusques alors auoit tenu pour Inuincible.

Le Roy fut tellement satisfait du seruice que M^r de la Mothe luy rendit en cette occasion, que Sa Majesté fit reuoquer l'ordre qu'elle auoit donné de ioindre confusément le corps de l'armée de M^r de Longueville avec l'autre. Voicy ce que Monseigneur le Cardinal Duc en escriuit sur ce sujet à M^r de la Mothe.

MON SIEUR,
I'ay appris par le Sieur de Boisdauid, & depuis par le sieur Faber, le signalé seruice que

que vous auez rendu avec le Corps que vous commandez en la Retraite de Quiers, où vous auez soustenu en cette Journée avec beaucoup de conduite & de courage tous les efforts & forces du Marquis de Leganez. Sa Maiefté en est tres-satisfaite, & en lieu de joindre le corps d'armée que vous conduisiez à celui de feu Monsieur le Cardinal de la Vaillette, pour servir conjointement avec Messieurs de Turenne & Plessis Praslin: Sa Maiefté a trouué bon de laisser sous vostre commandement le corps de Monsieur de Longueville, avec lequel vous auez desia rendu en Italie de si notables seruices. Monsieur le Comte d'Harcour receura les despesches de Sa Maiefté sur cela, afin qu'il ne soit rien chargé aux ordres qui sont establis: n'estant pas raisonnable qu'on vous diminue l'honneur lors que vous meritez qu'on l'accroisse. Vivez donc en repos de ce costé-là, & assurez vous que ie seray tousiours.

Le commencement de la Campagne de 1640. en Italie, fut la bataille & secours de Casal, monsieur le Comte d'Harcour donna l'aile gauche à commander à M^r de la mothe; & ce Prince trouuant à la droite de la difficulté en l'attaque des lignes, reuint à la gauche prendre les six Regimens d'Infanterie qui y estoient: & se mettant à la teste de celui de la mothe, retourna genereusement à l'attaque, ne laissant plus que six Regimens de Caualerie en l'aile gauche. Neantmoins par vn exemple innoüy que de la Caualerie seule ait gagné des retranchemens, M^r de la mothe l'exploita heureusement, ayant avec lesdits six Regimens ouuert le passage qui causa cette grande victoire. Il auoit esté reconnoistre les lignes: & les ayant bien cōsiderées, il môstra de dessus vne colline à ses principaux Officiers l'endroit par où il auoit resolu de les attaquer. Il leur monstra aussi au dedans d'icelles vne Cassine, aupres de laquelle il leur ordonna de se rejoindre apres qu'ils seroient entrez; puis cōmanda à M^r de la Luzerne d'aller avec 3. Regimens attaquer vn gros de Caualerie ennemie qui gardoit l'eminence de S. Georges, luy ordonnant de la pousser avec ardeur, afin que dans la confusion de la fuite il pût entrer pesle-mesle avec elle dans les retranchemens. Ordres qui furent ponctuellement executez par ledit sieur de la Luzerne. Et luy cependant à la teste du Regiment d'Anguyen & des deux autres qui luy restoient, marcha en vn endroit par lequel vn cheual pouuoit entrer: passage qu'il auoit exactemēt

remarqué lors qu'il alla reconnoistre lesdites lignes. D'abord il y fit passer 50. Maistres d'Anguyen conduits par Lonay Lieutenant & Granual Cornette, lesquels il suiuit avec les 3. Regimens qui luy restoiēt : & ainsi furent emportées les lignes de Cazal, malgré la resistance de ceux qui les gardoient, lesquels allerent ietter dans leur armée telle espouuante, que M^r de la Mothe (ayāt reioint led. S^r de la Luzerne à la Cassine assignée) deffit facilement la moitié de toute l'armée qui estoit de son costé, & ce avec sa seule Caualerie. Partie des ennemis s'enfuyant par vn endroit en 3. grands basteaux, il en fit couper les cordes : ce qui ioinct à leur trop grand nombre, les fit enfoncer dans le Pô ; & afin d'empescher les ralliement des autres, il poursuiuit les fuyards iusques à Pondesture. Sur le soir, apres auoir pris, tué, ou fait noyer tout ce qui s'estoit presenté de son costé, vint reioindre monsieur le Comte d'Harcour en la plaine de Fresinet, où il luy rendit compte de la Iournée, & le lendemain luy enuoya les drapeaux & cornettes qu'il auoit prises, & 1600. prisonniers. Il y eut huiet canons de pris, six mortiers, & tout le bagage de ce quartier-là, avec l'argent de l'armée ; qui fut vn riche pillage & butin pour cette Caualerie.

Les ennemis furent tellement estourdis de cette Iournée de Cazal, que monsieur le Comte d'Harcour eut le moyen de former le siege de Turin. Monsieur de la Mothe avec l'armée de monsieur de Longueville fut campé à la Purpurate, quartier de longue estenduë & le plus difficile à garder.

On ne doit icy obmettre la sanglante bataille de Turin. Elle est assez bien descrite dans le Panigiric de monsieur le Comte d'Harcour sur la Campagne d'Italie.

Voicy vne Iournée de sang, & vn choc extraordinaire. Le premier effort qui fut fait sur nous, commença au quartier de la Mothe Houdancour, entre la Purpurate & la Doüaire, où les ennemis parurent avec 4. ou 5. mil hommes de pied, & deux mil cinq cens cheuaux, cōmandez par Dom Carlo de la Gatta. Ils faisoient porter deuant eux quantité de fascines, de pontons, d'eschelles & d'outils, que les premiers rangs composez d'Officiers Reformez & armez de Rondaches, firent ietter dessus & dedans le fossé, l'Infanterie des ennemis s'y logea malgré toute la resistance & le feu du Regiment de Villandry, lequel ayant

pres de 2. mil pas de la ligne à garder, avec celuy de la Mothe, ne pût pas empescher qu'à la faueur & à couuert de tant de mousqueterie, qui tiroient sur eux incessamment, ceux qui estoient logez dans le fossé ne fissent vn passage pour leur Caualerie, qui entra dans nos lignes en grand nombre. Mais la Mothe y ayant accouru, suiuy du Regimēt de la Luxerne, les chargea avec tant de vigueur qu'il les chassa hors du retranchement, & se rendit maistre de la place. Toute fois ils y entrerent en plus grand nombre par vn autre endroit, où ils furent encore chargez si brusquemēt par ce braue Capitaine, qu'ils furent cōtraints de sortir pour la seconde fois de nos lignes, apres s'estre meslez parmy les nostres, dans vn combat qui dura plus d'une heure. Nous opposames à vne attaque opiniastre vne defense vigoureuse, qui reuint à la gloire d'un vaillant Capitaine, que le Ciel destinoit pour estre vn iour le fleau des Espagnols.

Cette forte resistāce n'empēcha pas que les ennemis reuenans vne troisiēme fois, avec toute leur Caualerie & Infāterie, n'entrassēt dās le Retranchement malgré les nostres : Mais durant le plus fort du Cōbat, les Regimēs de Beau-regard & du Terrail arriuerēt si à propos, qu'ils percerent plusieurs fois les esquadrons ennemis, renuersant leurs Bataillons d'Infanterie, laquelle pour lors commença de s'estonner : Iusqu'à ce que s'estāt ralliēe & remise en tres-bon ordre, la Mothe qui les vit tous passer & entrer dans son Retranchemēt, retira ses gens fort iudicieusement à la faueur d'une forte haye, pour les cōbatre en ce passage, où ils ne pouuoient venir à luy qu'en défilant. Ce qui luy succeda si heureusement, qu'ayant porté par terre plusieurs de leurs Caualiers qui auoient tenté le passage, il obligea les autres de retourner avec cōfusion. Les ennemis borderent cette haye de leur Infanterie, qui fit de si grādes décharges dessus nostre Caualerie, qu'elle fut cōtrainte de s'en aller prendre son Camp de bataille dans vne petite plaine, à 2. mousquetades de la courtine de la Citadelle, où les ennemis estoient obligez de passer par necessité. Ce qu'ils entreprirēt avec vne si belle dispositiō: que la Mothe qui obseruoit exactement leur marche, fut contraint d'attendre qu'ils luy monstrassent le flanc: & alors il prit son tēps si à propos, que les faisant charger par toute sa Caualerie il rompit leurs esquadrons & perça leurs bataillons, de sorte, que la tuerie ayant durē 1. heure, il en demeura plus de 2. mil morts sur la place. Et la Caualerie des ennemis fut si pressée, qu'abandonnant l'Infanterie, vne partie se sauua à la fuite le lōg de la Doüaire, & l'autre se precipitāt au bas d'une rauine, pour gagner la Ville par la prai-

rie, il y en eut encore vn grand nôbre qui marquerent la iournée par la perte de la vie. Cependât que la Mothe pourſuiuoit cette caualerie des ennemis iufques ſur la cõtreſcarpe du foſe de la Ville, où elle ſe retiroit, il fut aduerſy que 500. hommes du debris de l'Infanterie des ennemis auoient forcé vne redoute gardée ſeulement par 20. hommes des noſtres, & qu'ils ſ'y eſtoient logez. Tout auſſi-toſt il ſe porta ſur le lieu, inueſtit cette redoute, & avec quelque 300. hommes commanda l'attaque, qui fut faite de routes parts avec tant de cœur & de reſolution, que la barriere fut d'abord gagnée; & à meſme temps furent forcez & tous tuez par cette courageuſe Infanterie du Cãp & de la Citadelle. Les fuyards qui prirent le chemin de la Doüaire, furent ſuiuis par 200. cheuaux, qui en arreſterent encore trois ou quatre cens par les chemins. Ce combat fait à diuerſes reprifes dura pres de cinq heures, & la Mothe montra par tout ſon courage & ſon iugement dans vne égalle aſſiette.

Voilà comme cette bataille eſt décrite par vn Auteur François: les eſtrangers ne la releuent pas moins. Le Comte Galeazzo Gualdo Priorato, raporte en l'Histoire de ce temps, que ſãs cette victoire l'armée Françoisẽ auoit reſolu de ſe retirer *per la parte di Vanchia à Borgo di Po*. Et cẽt Historien confeſſe nettement, que la France à eũ cẽt auantage par la diligence de M^r de la Mothe, auquel il remarque les plus hautes qualitez qui ſe puiſſent rencontrer en vn Capitaine; la diligence, & le iugemẽt intrepide & temperé dans les confuſions & deſordres des combats; ſe ſont ſes termes: *Franceſi li quali hebbero queſta vittoria fortunatamente, e per diligenza del Signor della Motha, a cui la ſorte conçeſſe nella confuſione quella intrepidezza, e temperanza, che pochi benche prudenti ne ſono in caſi ſimili fauoriti.*

De vingt-neuf ſorties qui furent faites pendant ce ſiege, il y en eut vingt-trois du coſté de M^r de la Mothe, dont il y a iournal, & furent routes vigoureuſement repouſſées. Mais entre autres il ſ'en fit deux les 23. Iuillet & 1. d'Aouſt, pour faire ſortir les perſonnes inutiles de la Ville, avec ce reſte de Caualerie de Dom Carlo de la Gatta qui l'incommodoit, Turin ayant moins à faire d'hommes que de munitions.

La premiere diminua fort les ennemis, elle commença ſur les dix heures de nuit, que le Prince Thomas du coſté des Gardes, & le Marquis de Leganez aupres du Pô firent des feintes atta-

ques, afin de fauoriser vne sortie diuifée en Auantgarde & Arrieregarde. L' Auantgarde de cinq cens Maiftres, conduite par Dom Ioan de Lemos Espagnol, General de la Caualerie de l'Estat de Milan, marcha fans estre descouuerte le long de la Doire Susine iusques à la Purpurate, où les pionniers ouurirent cette partie du retranchement qui estoit entre ladite riuiere & vne redoute qui le defendoit : mais le fossé s'estant trouué trop haut & plein d'eau l' Auantgarde ne pût passer, & dans cette occupation elle fut surprise de M^r de la Mothe, lequel avec les Regimens d'Anguyen & du Terrail reuenoit d'un grand combat, par lequel il auoit battu & contraint l' Arrieregarde & Dom Carlo de la Gatta de regagner Turin; tellement que cette Auantgarde se trouuant enfermée fut contrainte à demander quartier, & demeura toute prisonniere, à la reserue de quelques Caualiers qui se perdirent en la Doire & dans le fossé. Dom Ioan de Lemos fut pris, ayant le bras cassé d'un coup de pistolet. M^r de la Mothe le traitta à la Françoisé, c'est à dire avec toute sorte de ciuilité & de courtesie, & le renuoya le lendemain sans rançon au Marquis de Leganez son parent.

Ce peu qui restoit de viures & de fourrages se consumant par tant de bouches inutiles, monsieur le Prince Thomas resolut de rentrer par vne autre & derniere sortie d'en vider la Ville : & pour y paruenir (par le moyen du canon courrier) luy & le marquis de Leganez conuinrent d'y proceder en cette maniere. Le matin du premier iour d'Aoust ledit marquis marcha avec partie de l' Armée Espagnole, & fit avec grand feu vne feinte attaque du costé de Colleins, afin cependant d'empescher m^r le Comte d'Harcour de secourir le quartier de la Purpurate. En mesme temps m^r le Prince Thomas sortit de Turin avec quatre mille hommes qu'il commandoit en personne, & ce pour fauoriser la sortie de douze cens cheuaux qu'il auoit baillez à conduire à Dom Carlo de la Gatta, avec des pontons & fascines, pour ne tomber pas au malheur de la sortie precedente. Monsieur de la Mothe avec le corps de l' Armée de monsieur de Longueuille s'opposa viuement à cette sortie, & après vn long combat contraignit m^r le Prince Thomas & D. Carlo de la Gatta de rentrer confusement dans la Ville, laissant au

champ de Bataille plusieurs de leurs morts; entre lesquels se trouua l'Amazone Allemande.

Turin s'estant rendu peu de temps après monsieur de la Mothe reuint en France: en passant à Chambery il y fut receu avec des accueils extraordinaires par Madame Royale, laquelle deuant luy ne se pouuoit laisser de raconter tout haut à ceux qui estoient presens les seruices qu'il luy auoit rendus & à monsieur le Duc de Sauoye son fils, lequel elle fit venir exprés dans sa chambre pour luy presenter monsieur de la Mothe comme elle fit, en disant: *Mon fils voila Monsieur de la Mothe, aymez-le bien, c'est vn des Gentils-hommes du monde lequel a le plus contribué au reſtabliſſement de voſtre Eſtat.*

AV retour d'Italie apres tant de belles actions, le feu Roy de tres-heureuse memoire, iugea monsieur de la Mothe digne d'vn des importans & espineux employs qui soit arriué pendant son Regne, en la place de monsieur d'Espanan, qui en sortoit par la force de l'armée du Roy Catholique.

Sa Majesté auoit esté eleuë, Prince de Catalogne, par vn consentement des peuples, qui reclamerent sa protection contre la fureur des troupes du Roy d'Espagne qui inondoient toute la Prouince. Monsieur de la Mothe fut choisi de Sa Majesté pour defendre cette glorieuse election, & conseruer à la France ce Principat, le plus noble & considerable qui soit en l'Europe.

Dés l'instant qu'il en eut receu les Ordres il partit de la Cour, & sur la fin de Ianuier 1641. arriua à Barcelonne, où la reputation qu'il auoit acquise en Italie, le faisoit attendre avec beaucoup d'impatience. Il y fut accueilly avec grandes demonstrations de joye de toute la Ville, & de Messieurs de la Deputation. Il les rassura de la part du Roy contre les apprehensions qu'ils auoient de l'armée du Marquis de Velez, lequel depuis sa retraitte de Monjuic auoit receu de nouveaux renforts de Castille.

Pendant que ses troupes filoient de France, il faisoit luy-mesme travailler aux Fortifications de Barcelonne & de Monjuic, mais il fut bien tost contraint d'en laisser la commission à d'autres: dautant que le Roy d'Espagne jugeant la guerre

de Catalogne de plus grande consequence que toutes celles qu'il auoit sur les bras, y jettâ aussi ses principales forces; y formant en mesme temps trois Armées considerables. Car outre l'ancienne qui estoit en la plaine de Terragonne, commandée par le Connestable Colonne Prince de Bothere, qui auoit succédé au Marquis de Los Velez, Sa Majesté Catholique en fit deux autres nouuelles: l'une à Tortose & Valence sous le Marquis de Leganez, & l'autre en Arragon, sous la conduite du Vice-Roy de ce Royaume, qui estoit le Duc de Nocera Titulate Napolitain, de la maison des Caraffes.

Ce dernier fut plus diligent à marcher que les autres: car pour fauoriser vne faction qu'il auoit tramée dans la ville de Lerida, il entra dans la Catalogne, où il assiegea Aytonne. Si tost que monsieur de la Mothe en eust eu aduis, il quitta les Fortifications de Barcelonne pour s'en aller en diligence à Lerida, où il calma pour lors les factions qui y auoient esté formées par quelques mal-affertes. Cependant il trouua moyen de ietter cinq cens hommes dans Aytonne, & vn iour apres il marcha droit à l'ennemy; lequel surpris de sa diligence leua le siege sans l'attendre, & se retira en desordre au delà de la Cinca, où son armée se dissipa incontinent.

Le mauuais succez du Duc de Nocera rallentit les marches du Prince de Bothere & du Marquis de Leganez, qui se vouloient ioindre. Pendant leurs deliberations, monsieur de la Mothe eut le loisir de remedier aux accidens qui luy pouuoient arriuer durant cette Campagne. Il luy restoit deux Armées à combattre; la moindre desquelles estoit plus forte que la sienne: celle qu'auoit le Prince de Bothere dans la plaine de Terragonne estant de vingt mille hommes effectifs, & celle du Marquis de Leganez vers Tortose de six mille hommes de pied, & de deux mille chevaux.

Afin de resister à tant de forces, Mr de la Mothe iugea qu'il luy estoit plus à propos de joüir de la reste que des mains; & sur tout qu'il luy falloit empescher que les deux Armées ennemies ne se pussent ioindre ny secourir. Pour paruenir à son dessein il se saisit du Col de Cabre, puis alla attaquer le Col Balaguier, que les ennemis auoient fortifié depuis que le Mar-

quis de Los Velez s'en faist en allant assieger Cambrils: neantmoins il fut emporté, & les ennemis y perdirent quatre cens hommes.

Monsieur de la Mothe estant asseuré de ces passages, se vint camper à la veuë du Prince de Bothere, & ce en lieu si auantageux, qu'il n'y pouuoit regulierement estre forcé, ny l'ennemy en sortant de la plaine de Terragonne (où il postoit) entrer par ailleurs dans la Catalogne. On peut facilement se persuader qu'une Armée de vingt mille hommes reduite en si peu de pays ne demoura pas long-temps sans pastir; & avec les necessitez, de diminuer en courage & en nombre. Ce qui fit resoudre enfin monsieur de la Mothe (apres auoir receu le secours que luy enuoya du Roussillon monseigneur le Prince son Generalissime) de sortir de la defensue, & de descendre dans la plaine de Terragonne, où à la barbe du Prince de Bothere il attaqua & prit les villes de Vals, Lescouuerte, & Constantin, & avec l'aide de l'Armée Nauale, le Fort de Salo.

Par la prise de ces places, monsieur de la Mothe resserra d'auantage cette puissante Armée, & en sorte qu'il la contraignit d'aller camper sous la portée du canon de Terragonne, où elle tomba en des necessitez si extremes, qu'apres auoir mesme mangé les prouisions de la Ville, chaque soldat estoit réduit par iour à deux onces de ris, & trois onces de chair de cheual: *de maniere que sans le premier secours que monsieur de Bourdeaux laissa entrer du costé de la mer, l'Armée & la Ville se rendoient ensemble deux iours apres.*

Tant de necessitez resolurent le Roy Catholique d'enuoyer ses Ordres au marquis de Leganez d'hazarder tout, pour secourir par terre cette Armée languissante, & au Duc de Ferrandine d'en faire autant par mer. Afin d'executer les commandemens de Sa Majesté Catholique, le premier se mit en campagne, & tenta de la secourir par le Col Balaguiet, qui estoit l'endroit par où le marquis de Los Velez entra en Catalogne, lors qu'il assiegea & prit Cambrils & Terragonne: mais M^r de la Mothe l'auoit tant bien muni, que ce General Espagnol y trouua vne telle resistance, qu'il en fut repoussé avec perte notable, & contraint de se retirer à Tortose d'où il estoit party.

party. En cette contre-marche, son Armée qui n'estoit presque composée que de milices, se dissipa. Le Duc de Ferrandine y fut plus heureux, car il secourut deux fois l'Armée : mais la dernière vint plus à propos pour sauuer la Ville que ladite Armée, qui se trouuoit alors entierement ruinée & consommée par les combats & necessitez où elle auoit esté reduitte, ne s'y estant trouué que 2000. homes & 200. cheuaux, apres que ledit Duc de Ferrandine eut emmené par mer les bleffez & les malades.

Vne si puissante Armée n'a pû venir à telles extremitez, sans qu'il y eust eu nombre d'escarmouches, de rencontres, & de combats; desquels il y a Iournal particulier, qu'on reserue à l'Histoire des guerres de Catalogne. On ne parlera pour cette fois que de la Iournée des Fourrageurs, qui est comme vne Bataille: considéré que les deux Armées entieres sorties de leurs retranchemens s'entrechoquerent en pleine campagne. Voicy comme les Historiens la racontent.

Les ennemis ayans formé vn dessein d'occuper quelque poste qui leur eslargist la communication de la mer, d'où ils estoient leur plus assuré secours de viures. M^r de la Mothe en eut avis par vn Walon transfuge, qui l'aduertit que le lendemain 10. de Iuillet les ennemis deuoient faire irruption sur quelqu'un de ses quartiers, avec 800. cheuaux & 2000. fantassins. Il donna ordre à M^r de Serignan (sous pretexte de faire montre aux troupes) de s'aduancer avec mille mousquetaires & cinq cens cheuaux à Tamaric, village qui n'est qu'à vne petite lieue de Terragonne, M^r de la Mothe cependant mit vne partie de ses troupes en embuscade, dans les montagnes voisines. Mais sur l'aduis que luy donnerent les gardes auancées, que les ennemis marchoient en plus grand nombre qu'on ne l'auoit aduertty, il reünit ses troupes, & se mit à la teste de sa Caualerie & Infanterie, qu'il fit aller par vn vallon qui luy estoit fauorable à couvrir sa marche, & mit son Armée en bataille le long d'une montagne, d'où il descouuroit la marche des ennemis de deux costez de la Ville. Il n'y fut pas plustost, qu'il vid sortir vn grand conuoy de Fourrageurs, qui apperceurent l'embuscade de nos troupes, & qui pour s'en garantir occuperent vne eminence fauorable, en laquelle ils furent incontinent renforcez de quel-

ques escadrons sortis de Terragonne. Afin de les chasser de cette eminence, monsieur de la Mothe commanda ledit Sieur de Serignan avec deux Regimens de Caualerie & cinq cens mousquetaires: & luy cependant voyant deux escadrons de reserve s'estre par trop auancez, les attaqua, prit, ou tua presque tous; & le conuoy des Fourrageurs se mit en fuitte.

Ce combat s'estant fait à la veuë de la Ville, l'Armée ennemie pour sauuer ses troupes auancées se mit en bataille sur vne petite montagne voisine, à portée de mousquet de ses retranchemens. Monsieur de la Mothe de son costé dispose pareillement l'Armée Françoisse en bataille, & pour inuestir les ennemis, donna ordre audit Sieur de Serignan (qui y fit des merueilles) de les attaquer par la gauche, comme luy fit par la droite, en sorte qu'il les deslogea de leur poste, & les poussa fuyans iusques dans leur retranchement.

L'aisle droite se defendit plus long-temps, & estoit prestee d'emporter vne eminence aduantageuse, lors que Mr de la Mothe iugeant l'importance d'icelle, destacha de son Armée trois Regimens François & vn de Catalans, avec trois compagnies de caualerie, qui obligerent l'ennemy à se retirer, & d'abandonner le poste. mais le Prince de Bothere resolu d'emporter cette colline contestée, y fit tenter vn nouuel effort par le Regiment du Comte Duc, soustenu des hommes d'armes appelez *Cruzados*, lesquels nous attaquerent impetueusement & avec valeur, mais qui furent aussi genereusement repoussez: ils cederent finalement & le poste & la victoire. Six cens Espagnols demeurerent morts sur la place, cinq cens prisonniers, & huit & neuf cens mules de butin.

Après la dissipation de l'Armée de Terragonne, monsieur de la Mothe retiré dans ses quartiers de Vals & Constantine, y laissa quelques troupes: puis marcha avec le reste de l'Armée aux frontieres d'Arragon, sur l'aduis que luy donnerent les Catalans, que les principaux de ce Royaume estoient prests à se souleuer pour leur liberté. Monsieur de la Mothe étant arriué à Lerida, il trouua que de la faction qu'il auoit assoupie au commencement de la Campagne, en estoit née vne autre prestee à esclorre, que sa presence dissipa. Cela l'obligea neantmoins de

laisser ses meilleures troupes dans ladite Ville, & seulement avec mille chevaux & quinze cens fantassins aller apprendre des nouvelles d'Arragon. Il sceut en ce voyage comme le Roy d'Espagne auoit calmé la reuolte de ce Royaume-là dans sa naissance, par l'emprisonnement du Duc de Nocere, que Sa Majesté Catholique en auoit soupçonné l'Auteur (quoy qu'injustement) sur des charitez de Cour.

Monsieur de la Mothe se iugeant inutile en ces frontieres, prit en s'en retournant Tamarit; & de là repassant par Lerida, il retourna avec pareille diligence qu'il estoit venu en la plaine de Terragone: où il arriva le mesme iour que le Prince Bothere auoit fait dessein d'enleuer vn quartier aux troupes qui auoient esté laissées aupres de Constantine, croyant encor M^r de la Mothe aux frontieres d'Arragon. Pourquoy il auoit commandé six cens fantassins & toute sa Caualerie, dont M^r de la Mothe ayant esté incontinent aduertty par les Espions qu'il entretenoit dans Terragonne, il fut la nuit mesme leur dresser vne embuscade, par le moyen de laquelle il vouloit les couper en retraite. Vn cas fortuit facilita son entreprise, trois Vedettes des ennemis estans heureusement tombées entre ses mains, il logea en leur mesme place trois de ses soldats, lesquels il fit habiller des habits desdites Vedettes, qui firent du haut de la montagne les mesmes Signals que les autres deuoient faire: chose qui réussit si bien, que les ennemis continuans leur route furent chargez par M^r de la Mothe: La Caualerie prit la fuite, apres auoir perdu vne trentaine de leurs compagnons, & toute l'Infanterie fut tuée ou prisonniere. Cette action fut baptisée par le feu Roy du nom de *La Journée des Vedettes*. Le Prince de Bothere en eut tant de desplaisir, qu'accablé d'un si grand nombre de disgraces qui s'entresuiuirent en quatre mois, il mourut peu de iours apres dans Terragonne.

Cette Campagne finit glorieusement par le secours d'Almenas, le Duc de Toralte & Dom Vincent de la Marre ayans formé vn nouveau Corps d'Armée du debris de celles du Duc de Nocera & du marquis de Leganez, surprirent ladite Ville située aux frontieres d'Arragon le 4. Nouembre, pendant vn grand broüillard qui les fauorisoit. Le Gouverneur qui estoit

Catalan se defendit au chasteau, assez bon d'anciennes tours & murailles, sinon qu'il estoit commandé d'une montagne voisine. Le Duc de Toralte le fit battre de quatre canons; & à cause qu'il y auoit vn grand peuple, les habitans s'y estans retirez, il l'incômodoit encore de bombes & de grenades. M^r de la Mothe ayant eu aduis de ce Siege y marcha en telle diligence, que dès le lendemain qu'il en eut avis, il se trouua à demie lieuë de l'ennemy, d'où il assura le Gouverneur qu'il le secoureroit: Son Armée pouuoit estre de mille cheuaux & 2500. hōmes de pied, & celle du Duc de Toralte estoit de 2500. cuirasses & de 3000. fantassins. Le premier iour, M^r de la Mothe pour secourir la place marcha le long de la montagne, & les ennemis à l'opposite, vn valon & rauine entre deux: mais afin d'auoir plus d'auantage, ils firent retirer leurs batteries pour s'en seruir contre l'Armée Françoisë, qui n'en auoit point. Ce premier iour que les Armées furent en presence, il n'y eut que quelques legeres escarmouches. Le lendemain dès le point du iour l'ennemy qui auoit reconnu nos forces inégales aux siennes, se presenta derechef en bataille resolu de nous combattre: mais mondit Sieur de la Mothe se retira à Algoüaire, où le Gouverneur du chasteau d'Almenas luy enuoya signifier & protester, que si dans le iour suiuant il n'estoit secouru, il se rendroit.

Ladite place ne se pouuant secourir par la force, contre vne Armée plus puissante & bien postée, M^r de la Mothe s'aduisa de le tenter de nuit par stratageme: Il dit à tous les tambours & trompettes de l'Armée de suiure le S^r d'Amboise & de faire ce qu'il leur ordonneroit; & il commanda au S^r d'Amboise qui estoit Capitaine au Regiment de merinville, d'aller de nuit par la montagne droit à Almenas avec cent maistres dudit Regiment, & que pour donner l'espouuante il chargeast tous ceux qui se presenteroient: que sur les quatre heures après minuit il ne manquast de commander aux tambours de sonner continuellement la marche par les chemins, & aux trompettes par interualle: qu'aux approches d'Almenas il leur fit sonner la charge aux vns & aux autres. Ce projet reüssit comme M^r de la Mothe s'attendoit: car les ennemis croyans que l'Armée Françoisë fust du costé où ils oyoient les tambours &

trompettes, y marcherent; cependant M^r de la Mothe allant de l'autre costé par vn vallon avec 500. chevaux, força toutes les gardes que l'ennemy auoit laissées dans la Ville, secourut le Chasteau: d'où il fortit tost apres, donnant aduis audit Sieur d'Amboise de se retirer avec ses trompettes & tambours. Toralte voyant la place secourüe, ne voulut persister dauantage au Siege, & se retira dans les quartiers d'hyuer.

LA Campagne de 1642. ne fut pas moins heureuse à M^r de la Mothe que la precedente. Le Marquis de la Ynoyosa le voyant esloigné vers les frontieres d'Arragon, prit l'occasion de son absence pour assieger Valz avec cinq mille hommes de pied, douze cens chevaux, & cinq pieces de canon: on luy en donna aduis en grande diligence, & s'y en vint avec vne si extraordinaire, que sa presence en veüe de l'ennemy preuint la nouuelle de sa marche. Ce qui estonna tant le marquis de la Ynoyosa, qu'il leua le Siege: & fit sa retraite en tel desordre, que M^r de la Mothe les contraignit au combat pres de Villelongue où il le batit. Les Relations Catalanes, à cause de cette extreme diligence, mettent cette action entre les plus belles qui se soient faites en Catalogne, & l'appellent *La Bataille de Villelongue*. Elles marquent neuf cens morts sur la place, deux canons pris, avec plusieurs prisonniers.

Deux mois apres, cette victoire fut suiuite d'une autre beaucoup plus memorable. Elle arriva sur ce que le Roy d'Espagne voyant Colioure assiegé, Perpignan en peril, & le Roy de France en chemin pour entrer en personne dans les Espagnes: Sa Majesté Catholique, afin d'empescher ses grands projets des François, resolut de ietter vne Armée considerable dans le Roussillon, & de la fortifier des meilleures troupes qu'elle eust. Pour ce, le Capitaine Ioseph Sem passa à Roses sur des vaisseaux de Dunkerque & de Dantzic 6000. hommes de pied avec toutes les munitions necessaires à vne puissante Armée.

Et d'autant qu'on ne peut pas porter sur la mer nombre de Caualerie, Sa Majesté Catholique en forma vn grand Corps, qui deuoit aller par terre ioindre sadite Armée de Roussillon: & pour la conduire, nōma General D. Pierre d'Arragon Marquis de Pouare, & le Duc de Toralte son Lieutenant general:

lesquels ayans eu Ordre de choisir les meilleurs hommes qu'ils pourroient dans les armées de Valence & d'Arragon, passerēt en celle de la plaine de Terragone commandée par le Marquis de la Ynoyosa & Comte d'Aguilar, en laquelle ils choisirent aussi ce qu'il y auoit de meilleur: & en formerent vn Corps de 2500. cheuaux, de mille Dragons, & de mille Officiers Reformez ou vieux Soldats; lesquels (afin de trauerser la Catalogne avec plus de diligence) deuoient estre alternativement montez sur des mules ou bidets. Huiet cent mules furent aussi destinées à porter des viures pour douze iours.

Cependant les ennemis ayant repris Constantine, M^r de la Mothe apprit par les intelligences qu'il entretenoit à Terragone le dessein du Marquis de Pouare: ce qui le fit refoudre à obseruer sa marche, sans songer à autre chose; Comme de fait les ennemis firent plusieurs feintes pour le diuertir ailleurs. Ils enuoyerent des troupes du costé de Tortose, faisans mine de vouloir attaquer le Col Balaguiet; & firent courir le bruit, que le dessein du Roy d'Espagne estoit de secourir le Roussillō avec son Armée d'Arragon, qui deuoit entrer par le Comté de Foix: Et pour rendre ce bruit vray-semblable, ils furent assieger Trem Ville de Catalogne qui estoit de ce costé-là: mais M^r de la Mothe, sans mouuoir son Cāp, se contenta d'y enuoyer du secours, par le moyen duquel les habitans firent leuer le siege. D'ailleurs, le Marquis de la Ynoyosa auoit gagné les montagnes escarmouchant continuellement, afin d'obliger M^r de la Mothe à demeurer pour s'opposer à ses desseins.

Finalemēt ses Espions luy donnerent aduis, que le Marquis de Pouare avec ce grand Corps d'elite, s'estoit separé du gros de l'Armée de Terragone le 23. de mars, afin de trauerser la Catalogne pour entrer dans le Roussillon. Dés l'instant, par la marche que prit l'ennemy M^r de la Mothe iugea de celle du reste de son chemin; & pour l'empescher & preuenir fit les ordres necessaires, donna Rendez-vous à ses troupes en des quartiers qui se rencontroient sur la route des ennemis, & mādā aux Catalans qui habitoient sur cette mēme route de publier leur *Sommetan*, c'est à dire de preparer leur milices: avec ordre de ne paroistre le iour que sur des eminences, & la nuit

faire grands feux & grands bruits, & d'allarmer continuellement les ennemis à coups de mousquetades: & escriuit à Dom Ioseph de Margarith, d'aller avec ce qu'il pourroit amasser de milices Catalanes se camper à S. Saloni & s'y retrancher, estant vn endroit où il falloit de necessité que passast le Marquis de Pouare.

Après auoir donné ces ordres il demeura encor deux iours combatant avec l'Armée ennemie, à laquelle il fit quitter les montagnes, paroissant luy mesme par tout, afin de faire croire au Marquis de la Ynoyoza qu'il ignoroit le dessein de la marche de Pouare: & afin de l'entretenir dans cette creance, il fit le soir du 25. venir dans sa chambre, comme s'il eust esté malade, des prisonniers qui luy renuoyoit. Ayant lors communiqué sa resolution à M^r du Terrail, auquel il laissa ce reste d'Armée à commander, luy ordonnant garder tousiours ce poste iusques à nouuel ordre: il partit & marcha sur des relais toute la nuit; en sorte qu'il arriua sur les 8. heures du 26. à Pierre où estoit le Rendez-vous de ses meilleures troupes.

Vne heure apres son arriuée, les batteurs d'Estrade luy donnerent aduis que l'ennemy defiloit en vn chemin creux peu esloigné. Il le laissa aller, defendant à ses troupes de paroistre, iusques à ce qu'il apprist que l'arriere-garde estoit moitié passée; & alors il fit charger si à propos, que quatre cens hommes demurerent morts sur la place & quantité de prisonniers. Cette attaque inopinée resserra l'ennemy, mais elle ne luy empêcha pas de continuer sa marche iusques au 28. qu'il y eust vn grand combat, auquel la victoire balança long-temps, mais la prise de D. Vincent de la Marre nous la facilita. Ce qui obligea l'ennemy le lendemain 29. à faire volte face pour retourner à Terragone; iusques au 31. & dernier de Mars, que D. Pietro d'Arragon & toute son armée harassée de tant d'attaques de celle de France qui les escarmouchoit de iour; & les alarmes continuels des Catalans les empêchant de reposer pendant la nuit; outre les viures qui leur manquoient, apres de si longues marches & contre-marches: voyant les passages occupez, & derechef pres de Villefranche attaquez de toutes parts en vn troisième combat, ils furent contraints de demander quartier.

En ces trois combats, & en cette longue marche & contre-marche de 8. iours, il se rencontra beaucoup de particularitez remarquables : qui sont si exactement descrites dans la Trompette Catalane, & dans tant d'autres Relations qui ont esté imprimées en Latin & en toutes les langues de l'Europe, qu'il seroit inutile de les représenter en ce lieu. Il suffira de dire que ce fut vne victoire entiere, & vne des plus importantes qu'ait iamais remporté la France dans l'Espagne : Memorable, en ce que de toute cette Armée il ne s'en est pas sauué vn, tous ayans esté tuez ou faits prisonniers. La consequence en fut grande, en ce qu'elle mit le Roy Catholique dans l'impuissance de secourir les Villes de Colioure & Perpignan. Le Roy recognoissant cette heroïque action, honora M^r de la Mothe du Baston de Marechal de France. Et de plus, Sa Majesté auoit proposé au Chapitre qui fut tenu pour la promotion de M^r le Prince de Monaco, d'enuoyer aussi l'Ordre du S. Esprit aux Marechaux de Guebriant & de la Mothe, Sa Majesté iugeant que ceux qui commandoient si glorieusement ses Armées dans les Pays estrangers, deuoient porter ces marques d'honneur : mais les ialousies & les intrigues qui estoient lors à la Cour, empescherent les effets de la bonne volonté de Sa Majesté.

Après cette signalée victoire, les Catalans qui disoient auoir intelligence dans Tortose, obligerent M^r de la Mothe d'y aller : mais après l'auoir tentée pendant trois iours, il marcha dans l'Arragon, où il reprit Tamarit : puis il assiegea & prit Monçon vne des principales Villes de ce Royaume-là. Il s'en alloit assieger Fragues, lors que les ennemis firent vne diuersion, qui l'obligea de retourner diligemment en Catalogne pour r'asseurer Barcelonne sur l'apprehension qu'elle auoit de voir à l'anchre deuant son port le Prince de Toscane avec toute l'Armée Nauale d'Espagne. Ce qui augmentoit cette crainte, estoit vne Armée de Terre qui estoit desia dans la plaine de Terragone au nombre de quinze mille hommes, commandée par le Marquis de Terragouze General de reputation : auquel se deuoient encor ioindre le Marquis de Mortara & le Baron de Sabaca avec autres 8000. hommes. M^r de la Mothe se vint camper à Ville-franche, d'où il empescha toutes ces Armées de passer

ser iufques apres la prise de Perpignan : De sorte que le Prince de Toscane ne voyant point agir l'Armée de Terre, se retira de deuant Barcelonne.

Cependant le Roy d'Espagne voyant tant d'Armées ruinées sous la conduitte de ses Generaux, & les pertes de Perpignan, Colioure & Monçon, se resolut de venir luy mesme à la guerre : & par vne puissance extraordinaire emporter dans la fin de cette Campagne toute la Catalogne & le Roussillon. Sa Majesté Catholique partit à cet effect de Madrid & se rendit à Saragosse. Cette Armée a esté la plus nombreuse qu'ait veu l'Espagne depuis les guerres des maures de Grenade. Les Estendarts des Ordres furent tirés avec ceremonie des Eglises de S. Iacques de Salamanque, de Calatraua & Alcantara; & portés à l'Armée pour signal, que le Roy & toute l'Espagne, marchoient à la guerre. On fit conduire à Fragues toutes les provisions & munitions necessaires, avec 40. pieces de canon : & pour l'entretien de cette puissante Armée, le Roy, la Reyne, & tous les Grands d'Espagne, firent battre en monnoye presque toute leur vaiselle d'argent. Les troupes s'assemblerent és Royaumes de Valence & d'Arragon, & se ioignirent à Fragues, où le Roy declara General de cette formidable Armée le Marquis de Leganez.

Monsieur de la Mothe apprehédant que tant de forces fondissent sur luy tout à la fois, fit son possible pour combattre le Marquis de Terragouze auant qu'il pût ioindre l'Armée du Marquis de Leganez. N'ayant pû empescher cette ionction, quelque diligence qu'il y apportast : la conseruation de Lerida qui s'en alloit perduë, la confiance qu'il auoit en la bonté de ses troupes, & vn poste auantageux qu'il occupoit, le firent refoudre (encore qu'il n'eust que douze mille hommes) d'attendre le choc d'une Armée presque deux fois plus forte que la sienne, de laquelle il fut attaqué le 7. d'Octobre à la veüe de la ville de Lerida.

Le Combat fut grand, long & opiniastré. La prise de deux de nos canons, & nostre Aile droite ébranlée par la furieuse attaque de l'Auanguardé, composée de la Noblesse volontaire d'Espagne, des Escadrons des Ordres, de 2000. Cuirasses avec

quatre mille fantassins, sembloit faire pancher la victoire du costé des ennemis, lors que M^r le Marechal de la Mothe l'acquit à la France par sa valeur. Vittorio Sirj au second Tome de son Mercure liure 3. exprime en termes elegans cette genereuse action. *Il Motha che d'all' a la sinistra ributato hauera, con gran valore il feroce assalto de Spagnoli, conosciuto il disordine de suoi siriconcentro nel suo essercito, & con due squadroni del Magaloti, & col Regimento suo di reserua, rimessa & riuigorita l'a la destra; la scaglio con tanto impeto sopra la vangardia Spagnola, che riuerbando il timore sopra di quelli ch'erano pur dianzi aggressori & vittoriosi, in vn' atomo mutata la paranza di quella scena, commenciarono prima a titubare, & poscia a saluar si disordinatamente.* Sans la nuit la tuerie eust esté plus grande. L'Armée Françoisse demeura maistresse du champ de bataille & des morts, qui excedoient deux mille, entre lesquels se trouuerent vn si grand nombre de Cheualiers des Ordres, que cela causa vne lamentation vniuerselle dans l'Espagne: laquelle fit par tout de mauuais augures de la perte de ces Religieux Estendards des Ordres, qui furent pris avec nombre d'autres Cornettes & Enseignes, & portez en triomphe dans l'Eglise de Barcelonne.

Monsieur le Marechal de la Mothe poursuivant sa victoire, contraignit le debris de cette effroyable Armée à se retrancher en lieu si defauantageux, que les eaux en ruinerent vne partie; & le reste se trouua enfin entierement dissipé par les diuers partys qui luy furent deffaits, & par la prise d'vn grand conuoy, lequel acheua de l'affamer & ruiner.

La colere du Roy Catholique jetta la faute de cette perte sur le marquis de Leganez, qui pour ce fut arresté prisonnier à Consuegra: & sur le mesme pretexte le Comte Duc fut disgracié, apres auoir entierement possédé le Roy son maistre plus de vingt années. Ledit Vittorio Sirj vn des plus iudicieux Historiens de ce temps, remarque la grandeur & la consequence de cette action. *Così vn essercito di trenta mile combattenti raccolto insieme con infinito dispendio, & per ultimo sforzo della Spagna nell' occasione dell' uscita del Rè: senza produrre alcun vantagio alla corona rimase miseramente dissipato; conche s'aua loro maggior mente la contumacia de Catalzuni, &c.* Et peu apres il adjouste: *Et si*

stabilirono vie più li Francesi in questa Prouincia communemente indicata vn' altra Fiandra alla Spagna. Il conclud à la fin. Per le medesimi ragioni firmo miglio-sula sua testa il Rè di Francia la corona di quel Principato.

Afin de recompenser ce seruice important, qui finissoit glorieusement cette heureuse Campagne, le Roy fit Duc M^r de la mothe : & Sa Majesté luy enuoya l'investiture du Duché de Cardonne de si bonne grace, qu'il ne se peut pas dire dauantage. On ne peut mieux exprimer ce bien fait du Roy, que par ce qu'en escriuit Monseigneur le Cardinal Duc à M^r de la mothe, par sa lettre du 27. Octobre 1642.

La Nouvelle que nous auons receuë de la deliurance de Lerida, par le gain de la Bataille que vous avez emporté contre le Marquis de Leganez, me redonne des nouuelles forces & ma santé; en m'ostant les inquietudes où i'estois de cette Place & de l'Armée que vous commandez. Il n'est pas mal-aysé de vous rendre de bons offices enuers Sa Majesté, puis que vous nous en donnez tous les iours matiere par vos prosperitez. Aussi puis-je bien vous assurer, qu'il n'y a point de Gentil-homme en France en meilleure estime aupres d'elle, & pour le bien duquel Sa Majesté se trouue si tost disposée. Pour nouuelles marques de sa Iustice & bonté enuers vous, Elle vous a donné la qualité de Duc & Duché de Cardonne, dont vous tirerez de grands aduantages, pour supporter les despeses que vous ferez d'oresnauant. Monsieur de Noyers enuoyant les Prouisions dudit Duché par lettre du mesme iour & datte que celle de Son Eminence, parle encor du contentement qu'eut Sa Majesté faisant cette gratification. I'ay mis es mains de Monsieur de Rennes les Prouisions du Duché de Cardonne, que le Roy a octroyé d'une façon si obligeante & glorieuse pour vous, qu'il ne se peut rien adiouster à la grandeur d'un tel bien-faict. Ayant Sa Majesté dit à Son Eminence, que iamais il n'auoit esleué personne aux dignitez de Marechal de France & de Duc de meilleur cœur.

Monsieur le marechal de la mothe ayant receu l'Investiture, la fit enregistrer au Greffe Royal de Barcelonne, & prit possession du Duché de Cardonne, avec toutes les formalitez necessaires selon les Constitutions de Catalogne : & en suite prit la qualité de Duc dans tous les Actes publics qu'il faisoit

Ce qui obligea extremement les Catalans, de voir qu'un Gentil-homme François qui auoit tant contribué à leur liberté, estoit deuenu leur citoyen & leur compatriote.

FLix place importante en Catalogne sur la riuere de l'Hebre, fut assiegée deux fois des ennemis pendant la Campagne de 1643. La premiere au mois de Ianuier, par le Marquis de la Ynoyosa lequel auoit desia formé son siege, & commencé ses bateries; lors qu'il apprit que monsieur le Marechal de la Mothe approchoit pour la secourir: ce qui luy fit leuer le siege & se retirer en diligence, ne voulant pas hazarder un combat encore que mondit sieur le Marechal, eust beaucoup moins de forces que luy. Le second siege y fut mis par D. Iean de Garay Capitaine de reputation, que D. Philippes de Sylues y enuoya avec six mille hommes: mais M^r le Marechal marcha en grande diligence au secours de la Place avec toute son armée. Ce qui fit leuer le siege avec telle confusion aux ennemis, qu'ils brulerent toutes leurs munitions & batteaux, & ietterent leur canon dans l'Hebre, afin de se retirer avec plus d'agilité.

Au commencement de cette Campagne, le Roy Catholique ayant fait passer des troupes d'Arragon en la vallée d'Arran, la fit reuolter contre la France. Ce qu'estant de perilleuse consequence pour le reste de la Catalogne, M^r de la Mothe pria D. Ioseph Margarith Gouverneur du Principat d'y aller en personne, comme ayant une entiere confiance en sa valeur & en sa fidelité tant de fois esprouuée pour le bien de la France: ce qu'il tesmoigna encore en cette occasion; où apres auoir pris le chasteau où s'estoient retirez les rebelles, il remit doucement le Pais dans l'obeyssance, & contraignit les troupes Castillanes de retourner en Arragon.

Nous finirons les actions militaires de M^r le Marechal de la Mothe par le secours de Mirauet, qui est une des dernieres qu'il a faites du regne du feu Roy. C'est un grand & fort Chasteau situé sur la riuere de l'Hebre. Le Marquis de la Ynoyosa ayant honte de sa retraite de Flix, prit occasion de l'assieger sur la fin de Feurier, pendant que l'armée Françoisse estant separée & diuisée dans les quartiers d'hyuer, ne pouuoit estre rassemblée

qu'avec difficulté; ni mesmes M^r de la Mothe qui estoit à Barcelonne en auoir aduis assez à temps pour le secourir. Neantmoins dès qu'il eut receu la nouuelle de ce Siege, il donna Rendez-vous à toutes ses troupes à Flix, où il se rendit aussi avec vne diligence extraordinaire. L'Armée qui pouuoit estre de trois mil hommes de pied & de 1200. cheuaux y trauersa l'Hebre la nuict assez incommodement dans vn seul bac & quelques petits bateaux; de sorte qu'elle ne pût estre passée que le lendemain sur le midy. Dès l'instant il marcha, & s'arresta sur le soir à trois quarts de lieuës de Mirauet, faisant feinte de vouloir assieger le chasteau des Maures (auquel les ennemis auoient mis garnison) il le fit afin de les amuser quelque temps, pendant lequel il feroit repaistre ses troupes, & apprendroient l'estat du Siege & de la Place; ayant fait auparauant aduertir le Gouverneur, qui estoit le S^r de Laual Capitaine au Regiment d'Espenan, qu'il approchoit pour le secourir. Sur la minuiet il apprit que le chasteau assiegé depuis 18. iours estoit aux abbois: & partit à dessein, s'il ne le pouuoit secourir, d'attaquer le Marquis de la Ynoyosa, lequel estoit campé à Gandezza proche de mirauet, d'où il rafraichissoit tous les iours ceux qui attaquoient la Place. Il marcha pour cet effect entre Mirauet & le Camp du General pour empescher leur ionction & les battre plus facilement séparés. Sur le bruiet de son approche le Marquis de la Ynoyosa se retira, & M^r de la Mothe sans le suiure tourna teste vers Mirauet, où il arriua sur le midy.

Les assiegeans estoient retranchez à l'entour du chasteau de telle sorte, & dans des postes si auantageux, que le Marquis de la Ynoyosa auoit assez de raison de croire qu'il estoit inutile à M^r de la Mothe de songer au secours de cette Place où il ne menoit pas de canon. Aussi les ennemis le voyans arriué, s'escrierent qu'il estoit venu assez à temps pour voir ce iour-là iouer la mine, & prendre la place en sa presence. Rodomontades qui ne les empescherent neantmoins de se preparer à le bien recevoir: & pour ce pointerent les canons qu'ils auoient auparauant dressé contre le chasteau, vers l'Armée Françoisse.

M^r de la Mothe ayant apperceu que les accez & abords des retranchemens estoient inaccessibles par le bas, & iceu que ou-

tre le premier retranchement il y auoit encor vne terrasse derriere la muraille de la basse cour qu'ils auoiēt gaignée, il se resolut toutesfois d'en feindre l'attaque, faisant munir ses soldats de fascines pour combler les fossés: & cependant ayant reconnu qu'au derriere du chasteau il y auoit quelque espace où les retranchemens n'estoient pas conduits, à cause qu'estât sur vn Roc escarpé, il n'y auoit porte ni fenestre par où on püst entrer ou sortir: il apprit par vn soldat que lui enuoya le Gouverneur qu'il feroit de ce costé-là vn trou au pied de la muraille & y mettroit vne eschelle pour monter ceux qu'il destinoit pour le secourir. Il se mit en bataille deuant les retranchemens, & sur la brune fit filer de l'infanterie qu'il auoit commandé pour le secours du chasteau, par vn valon qui en deroboit la veüe aux ennemis; & à la faueur de la nuit, ceux qui estoient ordonnées pour cela entrerent par ledit trou dans la place. Le S^r du Serre Lieutenant de ses Gardes y entra le premier avec 400. soldats, il fut suiui par mondit S^r le mareschal de la motte mesmes lequel ayant ordonné ce qui estoit necessaire pour attaquer les ennemis, il fit sur la minuiet demuraller les portes de dedans le chasteau, & abatre quelques pans de muraille pour pouoir sortir avec plus d'impetuosité sur les assiegeans par le deuant, tandis qu'au mesme tēps ses troupes qui estoient dehors en bataille les deuoient attaquer par derrier avec grād feu. Ce qui fut vigoureusement executé. Les ennemis se defendirent avec valeur au commencement; & nonobstant cette resistance, leurs approches & tranchées furent nettoyyées, 400. hommes des leur y demeurerent: apres quoy les nostres allerent combattre ceux qui defendoient les retranchemens, lesquels voyans la place secourüe, & eux attaquez de tous costez par deuant & par derriere, & inuestis entierement de nos troupes, demanderent quartier qui leur fut accordé; Il y eut 1200. soldats prisonniers, 200. Officiers, tous les Mineurs, Ingenieurs, Canonniers de leur Armée au nombre de plus de 60: le canon, le bagage, les drapeaux & cornettes demeurerent. La victoire fut entiere; & la deffaite d'autant plus considerable, que c'estoient les Regimens des Gardes du Roy & du Prince d'Espagne.

C E n'est pas seulement dans les actions de la guerre que les Services de Mr le Marechal de la Mothe ont esté utiles à l'Estat, il en a encor rendu de considerables dans le Gouvernement Politique, dont ses amis sont obligez de faire quelque mention; puis qu'en cela ils ont l'exemple de plusieurs hommes d'espée, lesquels en semblables accidens ne se sont pas contentez de représenter à leurs Princes ce qu'ils auoient fait dans les armes, mais ont exaggeré leurs autres actions qui regardoient le seruice de leurs Estats, soit dans leurs Conseils, Negociations, ou Ambassades, soit dans la Conduite des Peuples, & Gouvernement des Royaumes & Prouinces.

Les actions de la Guerre regardent ordinairement plus la gloire des Roys que le repos du Pays où on l'a fait. Les bons succez des Armées les font craindre aux ennemis, mais la sage conduite des Gouverneurs qu'ils enuoyent, leur concilie la benediction des Peuples. L'un est utile pour se faire redouter au dehors, & l'autre leur est absolument necessaire pour se conseruer & se faire aymer au dedans. En vn mot, il n'y a pas de seruice plus important, plus considerable & necessaire aux Princes conquerans (comme estoit le feu Roy) que ceux qui maintiennent & confirment dans leur obeïssance les Peuples qui leur sont nouuellement sousmis. Et si nos Roys eussent esté cy-deuant bien seruis dans ce haut poinct de Politique, la France possederait encor aujourd'huy Sicile, Naples, Gennes, & Milan, que l'imprudence & mauuaise conduite des Gouverneurs a plustost fait perdre, que la puissance des ennemis.

Pour Mr de la Mothe il y a parfaitement reüssi, ayant si prudemment & avec telle moderation gouverné les Catalans, qu'il a autant gagné de cœurs par sa bonté qu'il en commandoit par son autorité; la modestie empesche de dire icy ce qu'ils en ont escrit & imprimé, aussi y a-t-il tellement réglé toutes ses actions, & dans la Religion & dans les mœurs, qu'il a seruy d'exemple & aux peuples & aux soldats qu'il gouvernoit.

Le feu Roy l'enuoya en Catalogne incontinent que Sa Majesté eut receu la nouuelle que les Estats de cette grande Prouince l'auoient esleu pour leur Prince. En arriuant il trouua le pays sur la defensiue, & le Roy d'Espagne dans les preparatifs

de puissantes Armées. Choses qui n'estoient pas plus à apprehender au dehors, que les factions qui se tramoient au dedans. Ne se pouuât faire autrement que dans cette grâde reuolution dans l'instant d'un changement si memorable & extraordinaire, il ne restast des partialitez infinies, & des puissants ressorts de la maison d'Austriche pour recouurer vne perte qui entamoit les Espagnes. Toutes les histoires nous apprenent combien les dominations nouvelles sont espineuses, difficiles à maintenir, & pleines d'obstacles & de perils, que Mr de la Mothe a neantmoins surmonté, non par la cruauté ni par la crainte, mais par des maximes Chrestiennes, amiables, & naturelles à ces peuples.

Mondit sieur de la Mothe consideroit qu'il commandoit à vne des genereuses Nations de la Chrestienté, laquelle auoit le courage esleué, & par les glorieuses actions qu'elle a faites, & par sa liberté qu'elle a conseruée depuis mil ans, que Charles le Chauue vn de nos Roys luy en a octroyé les priuileges. Il scauoit le Prouerbe d'Espagne qui dit que le Roy fait ce qu'il veut à Valence, ce qu'il peut en Arragon, & en Catalogne ce qu'elle veut. Toutesfois il y a tellement agit, que son gouvernement est en benediction parmi les Catalans; & a fait en sorte qu'il a obtenu d'eux tout ce que le seruice du Roy son maistre a desiré.

Afin de leur faire gouster la domination de France, il les a gouverné d'une maniere toute differante de celle des derniers Vice-Roys d'Espagne, qui ont donné cause à leur souflement. Ceux-là, par leur faste & presumption ont aliéné les cœurs des peuples de l'affection du Roy leur maistre, & luy par son affabilité & courtoisie, il les a recueillis pour le sien. Ceux-là violoit & enfregnoient impunément les constitutions & immunités de la Catalogne, & luy estoit exact dans l'observation de leurs priuileges, sans y permettre aucune derogation.

Lors qu'il estoit question d'entendre les plaintes & de rendre Iustice, il donnoit également accez aux pauvres comme aux riches; & communiquoit si familièrement avec ceux du pays qui auoient à faire à luy, que personne ne se retiroit de sa
 presence

presence sans consolation ou satisfaction. Il ne nommoit personne aux charges que par l'aduis des principaux Officiers du pays. Il apportoit tant de soin à l'obseruation de la discipline militaire, que pendant la guerre il a fait viure les Catalans, comme s'ils eussent esté en paix, les habitans ne craignant non plus les soldats dans leurs maisons que leurs enfans.

Dans le commencement des guerres, que les ennemis pensoient continuer à traiter les Catalans à la mode de Cambrils, il ne voulut iamais faire aucun quartier entre ses troupes & les Espagnols, qu'ils ne l'eussent accordé premierement pour les Catalans que pour les François: A quoy par les heureux succez qu'il eut, & le grand nombre de prisonniers Castillans, il reduisit le Roy d'Espagne; & luy osta par cet ordre le moyen de se venger des Catalans, affermissant ceux-cy par vne telle protection en l'amour de nostre Nation: & pour les encourager dauantage, dans l'eschange des prisonniers Mr de la Mothe donnoit pour vn Catalan quelque illustre Espagnol que ce pût estre. La pieté & le soin qu'il auoit de faire bien seruir Dieu dans les Armées, & les rigoureuses Ordonnances qu'il faisoit pour la conseruation & seureté des personnes, des femmes, & des biens; afin de brider en cela la licence ordinaire des soldats, ont rendu le gouuernement François si agreable parmy ces peuples, qu'ils ont facilement oublié celuy de leur ancien Maistre, & ont depuis cent fois remercié Dieu, de ce qu'ils auoient secoué le joug de Castille.

Par cette sage conduite, Mr de la Mothe n'a pas seulement conserué la Catalogne dans l'obeïssance, mais l'y a tellement confirmée, que l'on peut dire avec verité que sur ces principes d'amour & de iustice, il a jetté les solides fondemens de la monarchie Françoisé dans cette belle & riche Prouince. L'experience ayant fait voir l'espreuue de l'affection & fidelité des Catalans, en ce que ny les formidables armées des ennemis, ny les intelligences & fortes sollicitations du Roy d'Espagne, jointes aux malheureux succez de la bataille de Leyde, & de la leuée du siege de Terragonne, n'ont pû ébranler cette fidelité des Catalans enuers la France; ny son absence, les disgraces de la Cour, avec sa detention, aucunement diminuer en-

uers ce genereux peuple l'estime & l'affection qu'il auoit pour mondit S^r le Marechal de la Mothe son Vice-Roy.

Pline, au Panegirique de l'Empereur Trajan, dit: Que la marque la plus infailible que le Prince & la Republique puissent auoir du bon gouuernement d'un magistrat, est le tesmoignage d'un peuple qu'il a gouuerné, apres qu'il ne le gouuerne plus. Ces grands sentimens qu'ont les Catalans pour M^r le Marechal de la Mothe depuis qu'il est sorty de leur pays: Ces desadueus publics qu'ils ont faits contre les calomniateurs, sont de ce genre d'approbation que desiroit cet Autheur: & des preuues certaines des seruices qu'il a rendu à l'Estat pendant qu'il les a gouuerné.

Estant chose digne de remarque, que lors que M^r le Marechal de la Mothe est muet & en prison, Dieu a ouuert la bouche & remué la langue au peuple de Catalogne pour plaindre ses disgraces, & publier les seruices qu'il a rendu à la Couronne en les gouuernant. Ce peuple n'a pas plustost sceu que par la Commission adressée au Parlement de Grenoble, mondit Sieur le Marechal estoit entrepris & accusé des choses qu'il auoit faites pendant qu'il estoit son Vice-Roy, que non seulement les grands & principaux Officiers du Pays, non seulement Messieurs de la Deputation, le bras militaire, les Corps des Chapitres des Eglises, de l'Inquisition, des Religieux, les Villes & Communautéz; mais les habitans des plus petits Villages se sont adressez à Monseigneur le Prince, pour luy tesmoigner combien la memoire du gouuernement de M^r le Marechal de la Mothe leur estoit en veneration.

Ce doit estre vne grande consolation à ce Gentil homme dans sa disgrace, d'auoir pour sa conduite le plus glorieux Testmoin qui soit en l'Europe. Ce grand Prince qui est la merueille de la France, & les delices de tous les Peuples qui le connoissent, qui est incomparable, & qui s'est rendu l'estonnement de toutes les Nations; par tant de prises de Villes, de Batailles & de Victoires, a sceu & veu en Catalogne par la satisfaction des Peuples & gens de guerre, que monsieur le Marechal de la Mothe estoit plus mal-heureux que coupable.

ON peut conclure ce discours par les mesmes paroles dont se seruit autresfois le Duc d'Ossone dans sa disgrâce, après auoir representé en vn pareil Factum à Sa Majesté Catholique tous les seruices qu'il luy auoit rendu dans la paix & la guerre: *Y seria ssomma infelicidad, que los calumniadores preualeciesen a las demostrations actuales y verdaderas de tantos meritos.*

Ses seruices sont les armes avec lesquelles il espere desarmer le courroux de Sa Majesté contre luy. Il est muet en prison par respect qu'il doit à Sa Mejesté, & employe la voix du feu Roy qui est eloquente en sa cause, & se fait assez entendre pour luy à son Fils, par les seules Prouisions de mareschal de France qu'il luy a donné. Il a quelque sujet de dire & de s'expliquer les mesmes propos de Iob à Dieu. *Qui suis-je moy, pour pouuoir respondre au Roy, & entrer en dispute par mes paroles avec luy? que quand mesme i'aurois quelque chose de iuste à alleguer pour ma defense, ie ne respondrois pas, mais i'aurois recours aux prieres. Quantus ergo ego sum ego, ut respondeam ei, & loquar verbis meis cum eo? Qui etiam si habuero quidpiam iustum, non respondebo, sed meum Iudicem deprecabor.* Iob 9.

Au conseil qu'on luy donneroît de parler pour se iustifier de quelque soixante & dix mille liures qu'on luy impute auoir diuertie à Sa Majesté, en produisant pour sa descharge les ordres du feu Roy, & en outre les actes & acquits autentiques qu'il a de l'employ de ces deniers, lesquels dans le cours ordinaire de la Iustice destruisent euidentement l'accusation pendante au Parlement de Grenoble, & qui irrite Sa Majesté contre luy, na-il pas raison d'opposer & de craindre les mesmes rencontres de Iob, bien qu'avec differens sujets? *Si ie me veux iustifier, ma bouche me condamnera, si ie me veux monstrier innocent, elle me rendra coupable.* C'est à dire, que les cœurs des Roys, qui sont les Images de Dieu, s'attendrissent par respects, & ne se flechissent pas par resistance, & qu'un silence avec eux est moins dangereux dans la disgrâce, que la plus iuste contradiction. *Si iustificare me voluero, os meum me condemnabit, si innocentem ostendere, me prauum comprobabit.* Iob 9. Il n'a pas affaire à vn homme semblable à luy pour démesler sa cause, & luy respon-

dre; & qui pourroit resister à la colere de celuy qui fait trembler l'Espagne, & l'Empire, & sous qui tout plie. *Quis potest resistere iræ eius qui curuat orbem.* Les amis de Fauorinus vn des plus grands Philosophes de son temps, s'estonnans de ce que dans les disputes de doctrine qu'auoit voulu faire avec luy Adrian l'Empereur (qui se picquoit de science) il ne se defendoit ny argumentoit à son ordinaire, & qu'il n'alleguoit pas les raisons qu'il pouuoit pour deduire les objections de cét Empereur; il leur respondit sagement, qu'il ne pouuoit moins faire, que de ceder à vn Prince qui auoit sur pied 30. Legions.

Quand la vie d'vn homme seroit lauée dans les eaux de la neige, pour parler avec l'Escripture, & que ses mains esclateroient de pureté, & seroient nettes de toutes sortes d'administrations d'argent & de taches. La seule auersion des Roys, & la recherche qu'ils feroient faire contre sa vie la soüilleroient d'ordures, & luy donneroient vn autre visage que son naturel, par la complaisance ou malice de ceux qu'ils y employent: dautant aussi qu'on ne se defend pas librement avec eux, & que personne n'ose rendre tesmoignage contre leurs volontez; n'y ayant pas iusqu'à present d'exemple d'innocence, qui ait esté à l'espreuue de la poursuite des Souuerains.

C'est pourquoy M^r le Marechal de la Mothe ignore sa vie, pour ne pas desplaire à Sa Majesté; sa langue est en prison aussi bien que sa personne. Il ne veut auoir l'usage de la parole, que pour remercier Sa Majesté de sa clemence, & non pas pour s'en defendre contre sa iustice. Il la supplie seulement de se souuenir de ses seruices. Ce sont là les clefs de la prison qu'il luy presente, pour luy ouurir les portes d'vn lieu, ou s'il a quelque regret, c'est d'estre inutile à Sa Majesté, & d'interrompre le cours de tant d'années qu'il a incessamment employé au seruice de sa Couronne.

L'Escripture nous apprend, que la colere de Saül contre Dauid s'adoucit par les reflexions qu'il fit sur les paroles de son fils Ionathas, qui luy representoit les seruices de Dauid: lequel par ce moyen fut regardé d'aussi bon œil de Saül, & en la mesme posture qu'il estoit auparauant. *Fuit ante eum sicut erat heri & nudius tertius.* Samuel 19. Et Salomon ce sage Prince

fuivit les conseils & executa le testament de Dauid son pere ; qui dans les dernieres paroles de sa vie , apres auoir recom-mandé à son fils la crainte de Dieu & l'obseruation de ses com-mandemens , pour attirer sur luy les benedictions du Ciel ; Il l'aduertit de se souuenir de départir ses graces & faueurs à ceux qui l'auoient assisté dans les guerres , & seruy és occurren-ces de ses affaires.

En l'Exode 28. il est commandé à celuy qui entroit dans le Sanctuaire , de porter sur le front vne lame d'or tres-pur , sur laquelle le Nom du Tout-puissant soit artistement graué. Ce commandement est fait , afin que le grand Dieu indigné s'ap-paisast iettant les yeux sur son nom. *Vt placatus sit ei Dominus.* Les Roys sont les Lieutenans de Dieu en terre , & doiuent se conformer à son exemple. C'est pourquoy le Marechal de la Mothe portant en sa personne tant de marques du feu Roy , ayant son seing & son nom escrit & graué si glorieusement en tant de Lettres & Tiltres qu'il luy a donné en suite de ses ser-uices , doit attendre de la bonté de Sa Majesté , qu'y faisant quelque reflection , elle oubliera les accusations qu'on a voulu faire contre luy ; lesquelles si elles estoient cogneuës de Sa Ma-jesté , elle les estimeroit indignes de sa colere , & au dessous de tant de seruices , & la conuiera de rendre la liberté à vn Gentil-homme , qui ne la desire que pour la perdre aussi bien que sa vie à son seruice. *Amen.*

LETTRES PATENTES DV ROY LOVYS LE IVSTE,
par lesquelles il a fait & créé Marechal de France,
Messire Philippes de la Mothe Houdancour.

LOVIS par la grace de Dieu Roy de France & de Na-uarre , A tous ceux qui ces presentes Lettres verront, Salut. Scachant combien les Roys sont obligez pour le main-tien de la grandeur de leurs Estats , de ne confier les Charges ausquelles ils ont attribué vne partie de leur autorité qu'à de dignes Sujets : & qu'ils ne peuuent faire d'action plus con-uenable à la Majesté Royale , n'y qui accroisse dauantage le

nombre & la fidelité de leurs seruiteurs; que de recognoistre ceux qui ont bien merité d'eux, & de la Couronne : Principalement dans la guerre, où l'honneur ne s'acquiert qu'en exposant genereusement ce qui est de plus cher. Et considerans que les Charges de Mareschaux de France sont establies pour la direction du bon ordre & de la Discipline militaire, & pour le commandement des Armées : comme aussi pour servir dans les plus importantes affaires & occurrences. Nous auons tousiours eu en singulier recommandation de n'éleuer à vne dignité si eminence, que ceux qui s'estans signalés dans les principaux employs, sembloient y estre appelez par les vœus publics, aussi bien que par nostre estime & nostre affection. C'est pourquoy ayant besoin de reparer les pertes que la longueur, les fatigues, & les occasions de la presente guerre contre la Couronne d'Espagne & la maison d'Autriche nous ont causés de plusieurs grands Chefs, mesmes d'aucuns mareschaux de France. Et cognoissans que nostre tres-cher & bien aimé le Sieur PHILIPPES DE LA MOTHE HOVDANCOVR nostre Lieutenant General en nostre Armée de Catalogne, sous nostre tres-cher & bien aymé Cousin le mareschal de Brezé; Capitaine d'une Compagnie de cent hommes d'armes de nos Ordonnances, maistre de Camp d'un Regiment de Caualerie, & d'un d'Infanterie Françoisse, Gouverneur de nostre ville & chasteau de Bellegarde; possede toutes les bonnes qualitez qui peuuent estre desirées pour tenir dignement vne si grande charge, soit par sa naissance & extraction, estant d'une tres-noble & ancienne famille, soit en sa personne: ayant donné beaucoup de preuues de sa valeur en toutes les charges de la guerre, n'y en ayant aucune qu'il n'ait exercé tres-honorablement: & ayant particulierement fait cognoistre la grandeur de sa capacité, de son iugement, de son courage, experience en la guerre, prudence, actiuité, vigilance, & conduite, & fidelité; & zelle singulier pour nostre seruice dans les commandemens que nous luy auons donnez en nos Armées de la Franche-Comté, d'Italie, & de Catalogne, où il a fait heureusement reussir tout ce que luy a esté commis, & a tousiours combatu avec aduantage. Et sur tout

s'est signalé, commandant sous nostre Cousin le Comte d'Harcour vn corps d'Armée, tant au dernier secours de Cazal qu'au Siege de Thurin, & en deux grands Combats faits deuant cette place qui en causerent la reddition en nostre pouuoir, Apres quoy estant passé en Espagne, il y a si vtilement employé nos forces, qu'en l'année dernière il a fait perir vne Armée de vingt mille hommes pres de Tarragone; l'ayant reduitte dans vn retranchement, sans qu'elle oüst en sortir, & l'ayant repoussée & batuë toutes les fois qu'elle a tenté de la faire. Il a contraint les ennemis a leuer plusieurs Sieges importants qu'ils auoient entrepris, il ne les a iamais rencontrés qu'ils n'en ayent receu perte, & affront: & nouuellement, il a remporté vne victoire tres-considerable sur vn grand Corps de troupes de l'Armée de Castille, composée de gens deslirés, & la pluspart d'Officiers Reformez, qui marchotent, & estoient desia beaucoup aduancez pour tenter de secourir Collioure, que nous tenions presentement assiegé, ayant en deux diuerses iournées taillé en pieces la meilleure partie des ennemis, bien qu'avec des forces inégales, pour ne les auoir pû suiure avec de plus grandes: & en la troisième, ayant avec nostre Armée défait le reste de ses troupes, pris les Generaux, & avec eux tous les Chefs de l'Armée ennemie, & plusieurs gens de marque; en sorte qu'il n'y a personne qui ne iuge combien ce coup esbranle les affaires d'Espagne, affermit le bon estat des nostres. Ces raisons iointes à l'esperance que nous conceuons d'estre d'autant plus dignement seruis dudit Sr de la Mothe, que nous luy donnerons moyen de le faire à l'aduenir avec plus d'autorité & de lustre: Nous conuient à l'honorer d'une charge proportionnée à son merite. **POVR CES CAUSES**, & autres bonnes considerations à ce nous mouuans: Nous auons ledit sieur de la Mothe Houdancour fait, constitué, ordonné & estably, faisons, constituons, ordonnons & establissons, par ces presentes signées de Nostre main Mareschal de France, & ledit Estat & Office que Nous auons de nouveau créé & augmenté, creons & augmentons en la faueur, outre & par dessus ceux qui l'ont à present, luy auons donné & octroyé, donnons octroyons, pour l'auoir, tenir, &

d'oresnauant exercer, en iouïr & vser, aux honneurs, autoritez, prerogatiues, preeminence, franchises, libertez, gages, pensions, droicts, pouuoirs, puissances, facultez, reuenus, & esmolumens qui y appartiennent; tels & semblables que les ont & prennent les autres Mareschaux de France; encore qu'ils ne soient si particulierement declarez n'y specifiez, tant qu'il nous plaira. **SI DONNONS** en Mandement à nos amez & feaux les Gens tenans nos Cours de Parlemens, & à tous nos Lieutenans Generaux, Gouverneurs, Capitaines, Chefs & conducteurs de nos Gens de guerre, & à tous nos Iusticiers, Officiers & Sujets, que ledit Sr de la Mothe Houdancour, duquel Nous nous reseruons de prendre le serment en tel cas requis, ils fassent, souffrent, & laissent iouïr & vser d'iceluy ensemble de tout le contenu cy-dessus plainement & paisiblement, & à luy obeïr & entendre és choses touchant & concernant ledit Estat de Mareschal de France. **MANDONS** en outre à nos Amez & feaux les Thresoriers de nostre Espargne & de l'Ordinaire de nos Guerres present & à venir & à chacun d'eux comme il appartiendra, que les gages, pensions, & droicts attribuez audit Estat & Office, tout ainsi qu'en iouïssent les autres mareschaux de France, ils payent, baillent, deliurent ou fassent payer, bailler & deliurer audit Sr de la Mothe Houdancour par chacun an, aux termes & en la maniere accoustumée: & rapportant ces presentes ou copie d'icelles deuëment collationnées, avec sa quittance sur ce suffisante seulement: Nous voulons tout ce que payé, baillé & deliuré luy aura esté à l'occasion susdite, estre passé & alloüé en la depense de leurs comptes, par nos amez & feaux les Gens de nos Comptes, auxquels Nous mandons ainsi le faire sans difficulté. **CAR** tel est nostre plaisir: En tesmoing de quoy nous auons fait mettre nostre seel à celsdites presentes. **DONNE'** à Narbonne le deuxieme iour d'Auril, l'an de grace mil six cens quarante deux, & de nostre regne le trente-deuxieme. Signé **LOVIS**, & sur le reply par le Roy, **SVBLET**, & seellé d'un grand Sceau de cire jaulne.

A NOSSEIGNEURS DE LA CHAMBRE
des Vacations.

SUPPLIE humblement Messire Philippes de la Mothe Houdancourt Cheualier Seigneur de Sacy, Rucour, & autres places.

Et remonstre que Philippes de la Mothe son fils Marechal de France, Duc de Cardonne, cy-deuant Vice. Roy, & Capitaine general en Catalogne, ayant esté renuoyé en cette Cour par Lettres Patentes du 17. Iuin dernier, pour estre iugé souverainement par le Parlement à la poursuite de monsieur le Procureur General, s'il n'a respondu pardeuant Messieurs les Commissaires du Parlement. Ce n'est pas par vne contumace odieuse & volontaire, mais pour ne faire preiudice au droit qu'il a de plaider au Parlement de Paris, tant par sa qualité d'Officier de la Couronne, que pour estre du ressort dudit Parlement.

Ce quia donné sujet à sondit fils de proposer le Declinatoire, & demander son renuoy audit Parlement de Paris qui auoit desia pris connoissance de cét affaire, nonobstant lesdites Lettres Patentes: lesquelles ayant esté données par le seul mouuement du Prince, & sans connoissance de cause, il n'a deu estre distrait de la iurisdiction de ses Iuges naturels, puisque nos Roys par leurs Ordonnances, notamment par celle de Blois art. 97. & 98. ont voulu que telles Euocations & Commissions données de leur propre mouuement fussent déclarées nulles, & de nule effet; Et que nonobstant icelles, l'instruction, & iugement des procez fust faite par les Iuges auxquels la connoissance en appartient. Ce sont les propres termes desdites Ordonnances.

Ce qu'ayant esté l'un des fondemens dudit Declinatoire, il a eu droit d'y persister comme il a fait jusques icy, sans offenser l'autorité du Roy, ny celle de cette Cour, puis qu'il est fondé sur lesdites Ordonnances: Que si par Arrest du Conseil du 2. de Septembre dernier, Sa Majesté a renuoyé ledit procez en ce

Parlement, luy attribuant de nouveau en tant que besoin toute iurisdiction & connoissance, & icelle interdisant audit Parlement de Paris : Et si en consequence dudit Arrest, la Chambre sans s'arrester audit Declinatoire a ordonné qu'il respondroit, & qu'il seroit procedé à l'instruction du procez. Lesdits Arrests ne peuuent l'exclure de plaider ledit renuoy, de mesme qu'il auroit pû faire auant iceux.

Car quand audit Arrest du Conseil ayant esté donné du seul mouuement du Prince & avec grande precipitation, & sans connoissance de cause, de mesme que lesdites Lettres d'euocation : Il a droit de s'opposer à l'execution d'iceluy, & faire voir par les termes desdites Ordonnances, que telles euocations & commissions extraordinaires ne peuuent estre d'aucun effet. Et pour ce qui est de l'Arrest de la Chambre, n'ayant autre fondement que lesdites Lettres Patentes, & Arrest du Conseil, il ne peut par les mesmes raisons auoir force, & autorité de la chose jugée contre luy.

Consideré notamment que c'est vn Arrest sur Requeste son fils ouïy, ny defendu cōme il deuoit estre (sous la correction de la Chambre) par le ministere d'un conseil, qui auroit remonstré les raisons pour lesquelles il deuoit estre renuoyé, nonobstant ledit Arrest du Conseil, & Lettres Patentes : Il auroit encor remonstré que la Chambre des Vacations ne pouuoit connoistre dudit Declinatoire, & qu'en tout cas, il deuoit estre iugé par le Parlement la Cour seante, les Chambres assemblées, puis que par lesdites Lettres d'euocation, & par ledit Arrest ledit procez est renuoyé audit Parlement, & attendu ses charges & qualitez.

Il auroit encor remonstré que la Chambre n'en pouuoit prendre connoissance sous pretexte de crime pretendu; car quand le Declinatoire sera iugé, il fera voir en temps & lieu, & pardeuant qui il appartiendra, que l'on n'a pû proceder criminellement contre luy pour le faict dont s'agist; & c'est l'une des raisons pour lesquelles il n'a voulu respondre ne souffrir vn procez à l'extraordinaire, puisque l'action dont s'agist ne peut estre intentée que par la voyeciuite.

De plus, les appellations interjettées par son fils estant fon-

dées sur incompetance & sur autres moyens de nullité, par lesquels il pretend de faire casser les procedures qui ont esté faites contre luy par l'action criminelle: C'est vne question prealable & preiudicielle qui doit arrester la continuation de ladite procedure: car si elle doit estre cassée, comme il espere de faire voir, c'est en vain de le vouloir obliger de respondre, & luy faire le procez à l'extraordinaire sur lesdites procedures, s'il n'y a point de crime.

D'ailleurs, le iugement dudit Declinatoire, & appellations doit estre fait la Cour seante, puis mesme que par lesdites Patentes le renuoy est fait au Parlement. Et pour cét effet il est necessaire à son fils d'auoir vn Procureur, & conseil pour le defendre aux occasions qui se presenteront, & que son conseil ait la faculté de conferer avec luy pour prendre les memoires & instructions qui luy seront necessaires pour la defense de sa cause; Cela ne fut iamais refusé à qui que ce soit, non pas mesme à ceux qui ont esté accusez de crimes capitaux qui refusoient de reconnoistre les Commissaires & Iuges que le Roy leur auoit baillé, comme à Monseigneur le Prince de Condé, sous François II. & depuis peu à M^r le Mareschal de Marillac, ausquels on donna conseil pendant leur declinatoire, & instruction de leur procez; Et à plus forte raison audit Sieur Mareschal contre lequel on ne peut auoir seulement vne action ciuile, pour la restitution des deniers dont s'agist, comme il fera voir en son temps par les ordres du Roy, & autres pieces sans contredit. Ce que le Suppliant est contraint de requerir pour sondit fils, puis que iusques icy on ne luy a pas donné la faculté de se defendre.

C'est pourquoy, Nosseigneurs, fera le bon plaisir de la Chambre renuoyer le iugement desdites appellations & declinatoire, la Cour estant seante les Chambres assemblées: Et par mesme moyen permettre audit S^r Mareschal son fils de constituer vn Procureur & conseil avec lequel il puisse librement conferer, pour prendre les memoires & instructions aux fins de plaider sur lesdites qualitez: Et enioindre ausdits Procureur & conseil qui auront esté choisis par ledit Sieur Mareschal d'occuper pour luy, à peine de priuation de leurs charges & de trois mille liures d'amende, attendu que iusques à present il a esté impossi-

ble de trouuer personne qui oſast occuper contre monsieur le Procureur General, chose bien extraordinaire, & sans exemple dans ce Royaume: Et cependant attendu le faict dont s'agist, & que le iugement desdites qualitez est entierement preiudiciel, vouloir surseoir ladite procedure criminelle & instruction dudit procez iusques à ce qu'autrement soit ordonné, & ferez bien.

A NOSSEIGNEURS DE PARLEMENT.

SV P P L I E humblement Messire Philippes de la mothe Cheualier Seigneur d'Houdancour, Sacy, Rucour, & autres places.

Disant qu'il auoit présenté Requête en la Chambre des Vacations, aux fins qu'il luy plüſt de permettre au mareschal de la mothe son fils d'establiſſir vn Procureur & Conseil pour le defendre aux occurrences qui se presenteroient, comme aussi de renuoyer le Iugement de l'affaire la Cour seante, & les Chambres assemblées.

Sur cette Requête la Chambre rendit Arrest le dixseptième Octobre dernier, portant entre autres choses qu'il seroit faict droit sur la requête dudit Suppliant le cas escheant & permis à son fils d'establiſſir vn Procureur & Conseil, & au surplus il fut ordonné qu'on viendroit plaider sur les appellations des procédures.

Mais cet Arrest est demeuré inutile à son fils; parce qu'il n'en a peu auoir l'expedition, quelles requisitions que ledit Suppliant ait fait faire verbalement & par escrit à M^e Louis Baudet Secrétaire du Roy ceans, & Greffier de la Commission: cōme il paroist par l'Exploit cy attaché que l'Huissier n'a voulu signer par la crainte ou defense de monsieur le Procureur General; n'ayant peu apprendre la cause de ce refus, qui est contre l'intention de la Cour, & l'usage ordinaire de sa Iustice; si ce n'est qu'on veuille oster la liberté à son dit fils de choisir vn Aduocat & Procureur pour se defendre, ce qu'il n'a peu encor faire, pour n'auoir eu l'expedition dudit Arrest qui luy en donnoit la permission.

C'est le fujet pour lequel le Suppliant est contraint de prier la Cour de vouloir Ordonner que ledit Arrest sera signifié & delivré à son fils, & que ses Appellations des procédures faictes contre luy seront plaidées & jugées durant la Cour toutes les Chambres assemblées.

Les Dignités de Duc & de Marechal de France que possède son dit fils luy acquierent ce droit, puisque comme Officier de la Couronne il est Conseiller né du Roy en ses Conseils d'Estat & dans ses Cours Souveraines, & a droit de Sieger dans les Parlements, le Roy y estant & seant dans son liét de Justice.

S'il estoit nécessaire d'autoriser cette Requête par des exemples, il seroit bien facile de le faire, non seulement à l'égard du Parlement de Paris, mais aussi pour les autres Parlements du Royaume, auxquels des personnes de cette qualité ont esté Jugées les Chambres assemblées, si lesdits exemples n'estoient notoires à la Cour.

Pour le Parlement de Paris, le Duc de Nemours Gentilhomme de la maison d'Armagnac qui n'estoit pas Pair, fut Jugé neantmoins à Noyon en l'an 1477. toutes les Chambres assemblées.

Le Connestable de S. Paul qui n'estoit ny Prince ny Duc, mais seulement Officier de la Couronne, a esté aussi Jugé par toutes les Chambres du mesmes Parlement assemblées en l'an 1475.

Monsieur le Marechal de Gié, qui fut renvoyé au Parlement de Toulouze en l'an 1530. fut pareillement Jugé toutes les Chambres dudit Parlement assemblées.

On auroit les mesmes exemples en cette Cour, s'il y avoit eu des personnes Jugées des qualités du Marechal de la mothe; puisque ce Parlement a Jugé le sieur de Montbrun qui n'estoit que Gentilhomme de condition de cette Prouince, les Chambres assemblées, à plus forte raison il y a lieu de le pretendre pour un Officier de la Couronne.

Le Roy a prejugué la question, par le choix qu'il a fait de Mr de la Coste President au mortier pour Commissaires avec Mr de la Martelliere, n'y ayant ny dans ce Parlement ny dans tous

les autres de ce Royaume aucun exemple, qui ne iustifie que quand il y a eu vn President au Mortier nommé pour Commissaire de quelque procès, que toutes les Chambres n'ayent esté assemblées pour le Iugement de l'affaire.

Les qualités de Marechal de France & de Duc luy doiuent faire esperer vn pareille traitement que le Parlement feroit au dernier Conseiller de son Corps. Outre telles dignités & la qualité des Commissaires, on doit considerer qu'il est entrepris & poursuui par Monsieur le Procureur General comme Vice-Roy de Catalogne, & pour les fonctions qu'il a fait dans ladite qualité de Vice-Roy, ainsi qu'il paroît par la commission enregistrée à la Cour, qui le porte en termes exprés.

Or si vn Conseiller de la Cour comme membre d'un Corps Souuerain doit estre iugé par tout le Corps les Chambres assemblées; à plus forte raison celuy qui ne possède pas en partie la Souueraineté comme le fils du Suppliant, mais en qui elle reside toute entiere, a-il droit d'attendre le mesme traitement?

Que si les Roys & les Empereurs qui ont eu des Vice-Roys pour gouverner leurs Royaumes & Prouinces, les ont excepté par leurs Loix des recherches & accusations, & que par vne possession & vsage n'a pas encor esté violé qu'en la personne du Marechal de la Mothe, ils se sont reserué à eux seuls la connoissance de la conduite desdits Vice-Roys, comme estans au dessus des Loix. Certainement s'il y auoit lieu à la Cour de n'auoir point d'esgard à vne prerogatiue si ancienne, & qu'elle voulust conformement aux Lettres Patentes de Sa Majesté connoistre de cette affaire, le Suppliant a sujet de croire que la Cour par sa Iustice le fera aussi honorablement qu'elle le peut, qui est toutes les Chambres assemblées.

D'ailleurs, quand bien mesme le Marechal de la Mothe ne seroit consideré ny comme Duc, ny comme Marechal de France, ny comme Vice-Roy, & qu'on ne le traitteroit, faisant abstraction de ses seruices & de ses charges, que comme vn simple Gentil-homme du ressort de Paris, d'où il est distrait, il ne pourroit estre iugé par vn moindre nombre de Iuges qu'il le seroit audit Parlement de Paris.

D'autant que ladite Euocation n'ayant esté donnée que du

pur mouuement du Prince, ne peut prejudicier aux droits & priuileges qu'il auroit au lieu d'où il est euoqué, où les simples Gentils-hommes en matiere criminelle sont iugez par toute la grande Chambre, & les Iuges qui en sont & seruent en la Tour-nelle & à l'Edit appelez, qui composent du moins trente-cinq Iuges, sans y cōprendre les Presidens & les Conseillers Clercs: ce qui esgalle à peu pres le nombre de tout ce Parlement les Chambres assemblées, principalement si on excepte ceux qui de droit n'y peuuent estre, ou sont absens.

Ce que considéré, N O S S E I G N E V R S, sera le bon plaisir de la Cour Ordonner, en premier lieu que ledit Arrest du 17. Octobre dernier sera expédié & signifié au fils du Suppliant, & que ses appellations seront iugées toutes les Chambres assemblées: & au surplus enioindre à quelqu'un des Huissiers qu'il plaira à la Cour de nōmer, de faire & signifier tous les Exploicts qui seront necessaires en Iustice, tant à M^r le Procureur General qu'au Greffier de ladite commission, & ferez bien. D V P R É.

*A NOSSEIGNEURS DE PARLEMENT,
toutes les Chambres assemblées.*

S V P P L I E humblement Messire Philippes de la Mothe Houdancourt, Duc de Cardonne, Comte de Beaumont, Marechal de France, cy deuant Vice-Roy & Capitaine general de Catalogne.

Lequel vous remonstre que le seizième du present mois, la Cour toutes les Chambres assemblées, auroit ordonné que la responce faite par le Suppliant touchant la Requête présentée en son nom seroit communiquée à M^r le Procureur general, qui n'auroit pas encor rendu ladite Requête avec l'adueu du Suppliant, n'usant que de remises & de delais pour retarder la Iustice de la Cour sur celle de ses demandes, desquels delais le Suppliant continuant à former ses plaintes à la Cour auroit le iour d'hier présenté Requête rapportée par M^r Boffin d'Argenson Conseiller, tendante aux mesmes fins que la presente, sur laquelle ledit sieur Procureur General ayant esté mandé à la Cour auroit promis de la remettre ce iourd'huy.

Ce considéré, N O S S E I G N E V R S, attendu que ledit sieur Procureur General a esté ouï quatre fois verbalement sur le

mesme sujet & qu'il a desia donné ses conclusions par écrit, il vous plaira sur les Requestes qui seront rapportées par ledit sieur Procureur General, ou au deffaut sur les mesmes cy attachées en presse faire droit, en ordonnant que les parties viendront plaider au premier iour apres les Roys, les appellations toutes les Chambres assemblées, & non autrement, & vous ferez Iustice, Signé HENRY DE LA MOTHE E. de Rennes.

Enjoint au Procureur General du Roy de rapporter ses Conclusions dans le iour, autrement sera pourueu, les Chambres assemblées. Fait en Parlement, les Chambres assemblées, le 20. Decembre 1647. signé
BAVDET.

*A NOSSEIGNEURS DE PARLEMENT,
toutes les Chambres assemblées.*

SVPPLIE humblement Messire Philippes de la Mothe Houdancourt, Duc de Cardonne, Comte de Beaumont, Marechal de France, cy-deuant Vice-Roy & Capitaine general de Catalogne:

Disant qu'il auroit eu avis que le sieur Procureur General pour interrompre & empescher que la Cour continuë à prendre connoissance de ses appellations Chambres assemblées, auroit obtenu certain Arrest ou Lettres Patentes, en vertu desquelles il pretend faire renvoyer le iugement desdites appellations en la troisieme Chambre, quelques autres Iuges choisis pour Commissaires & appelez des autres Chambres: ce qui est vne pure surprise faite à l'autorité de la Cour qui auoit desia pris connoissance de l'affaire, toutes les Chambres assemblées, contraire aux Lettres & Commission enregistrees à la Cour, contraire à la coustume des Parlemens & particulierement de celuy de Grenoble, contraire à la dignité des Officiers de la Couronne, des Ducs, & des Vice-Roys, & aux intentions mesmes de Sa Majesté, & autres raisons & moyens que l'on deduira.

A ces causes le Suppliant se trouue obligé de faire & former opposition à l'exécution & enregistrement desdites Lettres Patentes, desquels il plaira à la Cour les Chambres assemblées, luy ordonner communication pour les contredire plus amplement, & ferez Iustice, Signé HENRY DE LA MOTHE E. de Rennes.

Soit monstré au Procureur General du Roy. Fait en Parlement, les Chambres assemblées, le 8. Ianuier 1648. BAVDET.

Signifié audit sieur Procureur General par Gerlat Huissier, le 8. Ianuier 1648.